《藏要》本《摄大乘论》

《摄大乘论本》校勘说明

- 一.是书校历二周.一译校.二刻校。
- 二.译校用四种异译及二种释论对校。(一) 元魏佛陀扇多译摄大乘论.校注略称魏本。(二) 陈真谛译摄大乘论.略称陈本。(三) 隋笈多等译世亲摄大乘论释论牒文.略称隋本。以上三种并举则略称三本。(四) 西藏胜友等译摄大乘论.略称藏本。(五) 唐玄奘译世亲摄大乘论释.略称世亲。(六) 又玄奘译无性摄大乘论释.略称无性。以上两种并举则略称二释。
- 三.异译对校凡有三事。(一)品目.诸本开合立名有异者.悉为注出曰.以下某本不分品.或某本某品第几.某章第几。(二)文句.诸本具缺详略有异者.悉为注出曰.某本云云。其有异文与释论所解相关者.亦注出曰.与某释合.或今从某释。(三)意义.诸本译述较为明畅者.悉为注出曰.某本云云。因此对校而见奘译改文或有未惬者.并加按语曰.今译云云。

四.刻校用南宋刻为底本.对校丽刻明刻.订正文字.附注曰.原刻云云.今依某刻云云。

五.是书对校所用魏本陈本隋本及二释.悉取日本大正大藏经本。藏本则取曲尼版丹珠本 theg-pa chen-po bsdus-pa(原本经解部 ri 字函一页至四十三页上)。至南宋丽明三刻则依日本弘教书院版正藏及大正大藏经之校注。

摄大乘论本卷第一

无着菩萨造 1唐三藏法师玄奘奉诏译

²总标纲要分第一

³《阿毗达磨大乘经》中,薄伽梵前已能善入大乘菩萨为显大乘体大故说,谓依大乘,诸佛世尊有十相殊胜殊胜语:一者所知依殊胜殊胜语;二者所知相殊胜殊胜语;三者入所知相殊胜殊胜语;四者彼入因果殊胜殊胜语;五者彼因果修差别殊胜殊胜语;六者即于如是修差别中增上戒殊胜殊胜语;七者即于此中增上心殊胜殊胜语;八者即于此中增上慧殊胜殊胜语;九者彼果断殊胜殊胜语;十者彼果智殊胜殊胜语。由此所说诸佛世尊契经诸句,显于大乘真是佛语。

复次,云何能显?由此所说十处⁴于声闻乘曾不见说,唯大乘中处处见说,谓阿赖耶识说名所知依体,三种自性⁵一依他起自性、二徧计所执自性、三圆成实自性说名所知相体,唯识性说名入所知相体,六波罗蜜多说名彼入因果体,菩萨十地说名彼因果修差别体,菩萨律仪说名此中增上戒体,首楞伽摩虚空藏等诸三摩地说名此中增上心体,无分别智说名此中增上慧体,无住涅盘说名彼果断体,三种佛身一自性身、二受用身、三变化身说名彼果智体。⁶由此所说十处显于大乘异声闻乘,又显最胜,世尊但为菩萨宣说,是故应知但依大乘诸佛世尊有十相殊胜殊胜语。

复次,云何由此十相殊胜殊胜如来语故显于大乘真是佛语? 遮声闻乘是大乘性。由此十处于声闻乘曾不见说,唯大乘中处处见说,谓此十处是最能引大菩提性,⁷是善成立随顺无违,为能证得一切智智。此中二颂:

所知依及所知相,彼入因果彼修异,三学彼果断及智,最上乘摄是殊胜。 8此说此余见不见,由此最胜菩提因,故许大乘真佛语,由说十处故殊胜。

⁹复次,云何如是次第说此十处?谓诸菩萨于诸法因要先善已方于缘起应得善巧。次后于缘所生诸法应善其相,善能远离增益损减二边过故。次后如是善修菩萨应正通达善所取相,令从诸障心得解脱。次后通达所知相已,¹⁰先加行位六波罗蜜多,由证得故;应更成满增上意乐,得清净故。次后清净意乐所摄六波罗蜜多于十地中分分差别应勤修习,谓要经三无数大劫。次后于三菩¹¹萨所学应令圆满。既圆满已,彼果涅盘及与无上正等菩提应现等证。故说十处如是次第。又此说中一切大乘皆得究竟。

¹此字依明刻加,後卷俱同。

²以下藏本第一卷,不分品。魏本同。陳本第一分依止勝相衆名品第一,隋本作應知依止勝相勝語第一,又分十七章,此無等聖教章第一。

³藏本此段文句不次,略云:由己善入大乘菩薩說大乘大體故,於世尊前,謂依大乘在《阿毗達磨經》中, 諸佛世尊有十種語殊勝所殊勝聖語,云云。

⁴藏本此字作依處 (gnas-pa), 即十句所依之事也。

⁵藏本三性作依他、遍計、圓成,三本並同,今譯增文。

⁶藏本此二句云:"由此等於聲聞乘作殊勝之十處,諸佛世尊爲諸菩薩顯示大乘最勝。"魏本大同。

⁷藏本此二句云:"是於得一切智智善順無違。"

⁸藏本此句云:"此說此見餘不見。"今譯文晦。

⁹以下隋本第一品內次第章第二。

¹⁰藏本此句云:"依於增上意樂清淨,由先加行所得六度應更成滿。"隋本大同。

¹¹原刻作提,今依藏本及麗刻改。

1所知依分第二

此中最初且说所知依,即阿赖耶识。²世尊何处说阿赖耶识名阿赖耶识?谓薄伽梵于《阿毗达磨大乘经》伽他中说:"无始时来界,一切法³等依,由此有诸趣,及涅盘证得。"即于此中复说颂曰:"由摄藏诸法,一切种子识,故名阿赖耶,胜者我开示。"如是且引阿笈摩证。

复何缘故此识说名阿赖耶识?一切有生杂染品法于此⁴摄藏为果性故;又即此识于彼摄藏为因性故,是故说名阿赖耶识;或诸有情摄藏此识为自我故,是故说名阿赖耶识。

复次,此识亦名阿陀那识。此中阿笈摩者,如《解深密经》说:"阿陀那识甚深细,一切种子如暴流,我干凡愚不开演,恐彼分别执为我。"

何缘此识亦复说名阿陀那识? 5执受一切有色根故,一切自体取所依故。所以者何?有色诸根由此6执受无有失坏,尽寿随转;又于相续正结生时取彼生故,执受自体。是故此识亦复说名阿陀那识。

此亦名心,如世尊说心、意、识。此中意有二种,第一⁷与作等无间缘所依 止性,无间灭识能与意识作生依止;第二染污意.,与四烦恼恒共相应,一者萨 迦耶见,二者我慢,三者我爱,四者无明。此即是识杂染所依。⁸识复由彼第一 依生,第二杂染了别境义故,等无间义故,思量义故。意成二种。

⁹复次,云何得知有染污意?谓此若无,¹⁰不共无明则不得有,成过失故;又 五同法亦不得有,成过失故。所以者何?以五识身必有眼等俱有依故。又训释词 亦不得有,成过失故。又无想定与灭尽定差别无有,成过失故。谓无想定染意所 显非灭尽定,若不尔者,此二种定应无差别。又无想天一期生中应无染污,成过 失故,¹¹于中若无我执我慢;又一切时我执现行现可得故,谓善、不善、无记心 中。若不尔者,唯不善心彼相应故。有我我所烦恼现行非善无记,是故若立俱有 现行¹²非相应现行,无此过失。此中颂曰:

> 若不共无明,及与五同法,¹³训词二定别,无皆成过失。 无想生应无,我执转成过,我执恒随逐,一切种无有。 ¹⁴离染意无有,二三成相违,无此一切处,我执不应有。 真义心当生,常能为障碍,俱行一切分,谓不共无明。

¹藏本、魏、陳本皆不分品,隋本第一品內衆名章第三。

²藏本此句云:"世尊何處以所謂阿賴耶識者,說阿賴耶識耶?"

³藏本無此等字,魏陳本同。勘梵本安慧《三十唯識釋論》,引文亦同。

⁴藏本此二字作結著 sbyor-pa, 與上頌云攝藏 kun-gshi 字異, 其意謂因果等之密切不離, 故梵本安慧《三十唯識釋論》引此文作相屬。三本舊譯亦並作依住也。次同。

⁵藏本此句云:"是一切色根之因。"意異。下句云:"爲執取自體之所依故。"此云執取即今所譯執受,蓋以釋阿陀那之名義也。

⁶藏本此二字作執持 N~e-bar bzun-ba,次同。原意以此與執取互訓,今譯雜用無別。

⁷藏本此二句云:"由作無間緣而爲依止故,識滅無間名意,爲識生起之所依。"與下文相順。陳隋本均同。 今譯以意識連綴爲文,則似專爲第六意識而發,有誤。

⁸此段依藏本句讀,蓋依上所引經釋成識之名義也。意云: 識者復由彼第一依生,由第二依而成雜染,以了 別境義故爲識。此與無性合。

⁹藏本無復次二字,直接上文爲問也。魏本此一大段全缺,但有頌文。

¹⁰藏本此句云:"則成無不共無明之過失故。"餘句例知。

¹¹藏本此句在一期生中句上,文義更順。

¹²藏本無此非字,亦通。

¹³藏本依結頌法此二語互倒,陳本同。

¹⁴藏本此二句云:"若無染汚意,應無二違三。"今譯文晦。

¹此意染污故,有覆无记性与四²烦恼常共相应。如色无色二³缠烦恼,是其有覆无记性摄,色无色缠为奢摩他所摄藏故,此意一切时⁴微细随逐故。⁵心体第三若离阿赖耶识无别可得,是故成就阿赖耶识以为心体,由此为种子意及识转。

何因缘故亦说名心?由种种法熏习种子所积集故。

复次,何故声闻乘中不说此心名阿赖耶识,名阿陀那识?由此深细境所摄故。所以者何?由诸声闻不于一切境智处转,是故于彼虽离此说,⁶然智得成解脱成就,故不为说。若诸菩萨定于一切境智处转,是故为说。若离此智,不易证得一切智智。

复次,声闻乘中亦以异门⁷密意已说阿赖耶识。如彼《增壹阿笈⁸摩》说:"世间众生爱阿赖耶,乐阿赖耶,欣阿赖耶,憙阿赖耶。为断如是阿赖耶故,说正法时,恭敬摄耳,住求解心,法随法行。9如来出世,如是甚奇希有正法出现世间。"于声闻乘《如来出现四德经》中,由此异门密意已显阿赖耶识。于大众部阿笈摩中亦以异门密意说此名根本识,如树依根。化地部中亦以异门密意说此名穷生死蕴。有处有时见色心断,非阿赖耶识中彼种有¹⁰断。如是所知依说¹¹阿赖耶识为性、阿陀那识为性、心为性、阿赖耶为性、根本识为性、穷生死蕴为¹²性等,由此异门阿赖耶识成大王路。

复有一类谓心、意、识义一文异,是义不成,意、识两义差别可得,当知心义亦应有异;复有一类谓薄伽梵所说众生爱阿赖耶,乃至广说,此中五取蕴说名阿赖耶;有余复谓贪俱乐受名阿赖耶;有余复¹³谓萨迦耶见名阿赖耶。此等诸师由教及证愚于藏识,故作此执。如是安立阿赖耶名,随声闻乘安立道理¹⁴亦不相应。若不愚者,取此藏识安立,彼说阿赖耶名,如是安立则为最胜。云何最胜?若五取蕴名阿赖耶,生恶趣中一向苦处,最可厌逆,众生一向不起爱乐,于中执藏不应道理,以彼常求速舍离故。若贪俱乐受名阿赖耶,第四静虑以上无有,具彼有情常有厌逆,于中执藏亦不应理。若萨迦耶见名阿赖耶,于此正法中信解无我者恒有厌逆,于中执藏亦不应理。阿赖耶识¹⁵内我性摄,虽生恶趣一向苦处求离苦蕴,然于藏识我爱随缚未尝求离;虽生第四静虑以上,于贪俱乐恒有厌逆,然于藏识我爱随缚;虽于此正法信解无我者厌逆我见,然于藏识我爱随缚,是故安立阿赖耶识名阿赖耶成就最胜。

如是已说阿赖耶识安立异门,¹⁶安立此相云何可见?安立此相略有三种:一者安立自相;二者安立因相;三者安立果相。此中安立阿赖耶识自相者,谓依一

2藏本此二字作有覆煩惱。

¹魏本缺此一段。

³原刻作廛,今依麗刻改。次並同。

⁴藏本無此微細二字,陳隋本同,今譯似用成唯識論意。

⁵藏本此四字作第三者心之自體,蓋前文已釋意識二名各有其體,今次第三說心之自體也。

⁶藏本此語云:"由智得成故解脫成就。"陳隋本同。

⁷藏本無此密意二字,次下俱同,三本亦但云異名。

⁸藏本下云《如來出現四功德經》中。

⁹藏本此句云:"如來出世,則此希有正法亦出世間。"

¹⁰藏本次有一段云:"於聖上座部阿笈摩亦說頌云:'有分及見,貫徹安立,動及尋求,第七能引。'"與無性合。

¹¹藏本無此句,三本並同,意義更順,今譯衍文。

¹²藏本次云:"有分爲性等,彼即阿賴耶識。"

¹³原刻作有,今依藏本及麗刻改。

¹⁴藏本此語云"雖亦相應", 意異。

¹⁵藏本此語云:"執爲自內我故。"陳本同。

¹⁶以下陳本第一分內相品第二,隋本第一品內相章第四。

切杂染品法所有熏习¹为彼生因,由能摄持种子相应;此中安立阿赖耶识因相者,谓即如是一切²种子阿赖耶识于一切时与彼杂染品类诸法现前为因;此中安立阿赖耶识果相者,谓即依彼杂染品法无始时来所有熏习,阿赖耶识³相续而生。⁴

复次,何等名为熏习?⁵熏习能诠,何为所诠?谓依彼法俱生俱灭。此中有能生彼因性,是谓所诠。如苣胜中有华⁶熏习,苣胜与华俱生俱灭,是诸苣胜带能生彼香因而生。又如所立贪等行者贪等熏习依彼贪等俱生俱灭,此心带彼生因而生。或多闻者多闻熏习依闻作意俱生俱灭,此心带彼⁷记因而生。由此熏习能摄持故名持法者,阿赖耶识熏习道理当知亦尔。⁸

复次,阿赖耶识中诸杂染品法种子为别异住,为无别异?非彼种子有别实物于此中住,亦非不异,然阿赖耶识如是而生有能生彼功能差别名一切种子识。

⁹复次,阿赖耶识与彼杂染诸法同时更互为因云何可见?譬如明灯焰炷生烧同时更互;又如芦束互相依持,同时不倒。应观此中更互为因道理亦尔。如阿赖耶¹⁰识为杂染诸法因,杂染诸法亦为阿赖耶识因。唯就如是安立因缘,所余因缘不可得故。¹¹云何熏习无异无杂而能与彼有异有杂诸法为因?¹²如众缬具缬所缬衣,当缬之时,虽复未有异杂非一品类可得,入染器后,尔时衣上便有异类非一品类染色绞络文像显现。阿赖耶识亦复如是,异杂能熏之所熏习,于熏习时虽复未有异杂可得,果生染器现前已后,便有异杂无量品类诸法显现。¹³如是缘起于大乘中极细甚深。

又若略说有二缘起,一者¹⁴分别自性缘起,二者分别爱非爱缘起。此中依止阿赖耶识诸法生起是名分别自性缘起,以能分别种种自性为缘性故。¹⁵复有十二支缘起是名分别爱非爱缘起,以于善趣恶趣能分别爱非爱种种自体为缘性故。于阿赖耶识中若愚第一缘起,或有分别自性为因,或有分别宿作为因,或有分别自在变化为因,或有分别实我为因,或有分别无因无缘。若愚第二缘起,复有分别我为作者,我为受者。譬如众多生盲士夫未曾见象,复有以象说而示之,彼诸生盲有触象鼻、有触其牙、有触其耳、有触其足、有触其尾、有触脊梁,诸有问言:象为何相?或有说言象如犂柄,或说如杵,或说如箕,或说如臼,或说如箒,或有说言象如石山。若不解了此二缘起¹⁶无明生盲亦复如是,或有计执自性为因,或有计执宿作为因,或有计执自在为因,或有计执实我为因,或有计执无因无缘,或有计执我为作者、我为受者,¹⁷阿赖耶识自性、因性及果性等如所不了象之自性。¹⁸又若略说,阿赖耶识用异熟识一切种子为其自性,能摄三界一切自体一切

^{&#}x27;藏本此二句文倒云:"由與執持種子相應而爲彼生因性。"

²藏本此二字作自種子。

³藏本無此相續二字,陳隋本同。

⁴以下隋本熏習章第五。

⁵藏本此句云:"此熏習能詮之所詮爲何?"三本同。

⁶藏本此字作習染 bsgos-pa,與熏習 bag-chags 字異,蓋內外法不同也。

⁷藏本此二字作言說因,魏本同。

⁸以下隋本不一不異章第六。

⁹以下隋本第一品內更互爲因果章第七。

¹⁰此字依藏本及麗刻加。

¹¹以下隋本因果別不別章第八。

¹²藏本此句云:"如以種種果汁染衣。"與無性合。今譯從陳隋本,意云多縷結衣也。

¹³以下隋本緣生章第九。又藏本此句云:"是爲大乘深細緣起。"

¹⁴藏本此句作自性分別緣起,次後釋爲種種體性分別之緣性故。魏隋本同。次分別愛非愛緣起例知。

¹⁵魏本缺此一段。

¹⁶藏本此語云:"由無明而如生盲。"

¹⁷藏本此句在前無明生盲句下云:"不知如象之賴耶自性因果。"

¹⁸藏本此句云:"略說賴耶自性者。"總上文也。

趣等。此中五颂:

外内不明了,¹于二²唯世俗,胜义诸种子,当知有六种。 刹那灭俱有,恒随转应知,决定待众缘,唯能引自果。 ³坚无记可熏,与能熏相应,所熏非异此,是为熏习相。 六识无相应,三差别相违,二念不俱有,类例余成失。 此外内种子,能生引应知。⁴枯丧由能引,任运后灭故。⁵

为显内种非如外种,复说二颂:

外或无熏习,非内种应知,闻等熏习无,果生非道理。 作不作失得,过故成相违,外种内为缘,由依彼熏习。

复次,其余转识普于一切自体诸趣.应知说名能受用者。如中边分别论中说伽他曰:

一则名缘识,第二名受者,此中能受用,分别推心法。

如是二识更互为缘,如《阿毗达磨大乘经》中说伽他曰:

诸法于识6藏, 识于法亦尔, 更互为果性, 亦常为因性。

⁷若于第一缘起中如是二识互为因缘,于第二缘起中复是何缘?是增上缘。如是六识几缘所生?增上、所缘、等无间缘。如是三种缘起,谓穷生死、爱非爱趣及能受用,具有四缘。⁸

如是已安立阿赖耶识异门及相,复云何知如是异门及如是相决定唯在阿赖耶识,非于转识?由若远离如是安立阿赖耶识,杂染清净皆不得成,谓烦恼杂染、若业杂染、若生杂染皆不成故,世间清净出世清净亦不成故。

云何烦恼杂染不成?以诸烦恼及随烦恼熏习所作彼种子体,于六识身不应理故。所以者何?若立眼识贪等烦恼及随烦恼俱生俱灭此由彼熏成种非余,即此眼识若已谢灭,余识所间,如是熏习熏习所依皆不可得,从此先灭、余识所间、现无有体眼识与彼贪等9俱生不应道理。以彼过去,现无体故,如从过去现无体业异熟果生不应道理。又此眼识、贪等俱生、所有熏习亦不成就。然此熏习不住贪中,由彼贪欲是能依故,不坚住故。亦不得住所余识中,以彼诸识所依别故,又无决定俱生灭故。亦复不得住自体中,由彼自体决定无有俱生灭故。是故10眼识、

¹藏本此二字作二者,無此於聲,與無性論本合。

²藏本無此唯字, 與無性合。

³藏本此字作固定。

⁴藏本此二句云"枯喪引續故,如矢不中墜",與無性論本云"如任運後滅"意同。

⁵魏本缺此二頌。

⁶藏本此字作結着,與上文合。

⁷以下隋本第一品內四緣章第十。

⁸以下陳本第一分內引證品第三,隋本煩惱染章第十一。又藏本此句云:"己由異門及相安立賴耶。"陳本同。 ⁹藏本此二字作俱起,意謂眼識現起爲因乃有貪等,故云"與貪等俱起",與前云"俱生俱滅"意異,今譯 不明。

¹⁰藏本此語云於眼識中。

贪等烦恼及随烦恼之所熏习不应道理。又复此识非识所熏,如说眼识,所余转识亦复如是,如应当知。

复次,从无想等上诸地没来生此间,¹尔时烦恼及随烦恼所染初识,此识生时应无种子,由所依止及彼熏习并已过去,现无体故。

复次,对治烦恼识若已生,一切世间余识已灭,尔时若离阿赖耶识,所余烦恼及随烦恼种子在此对治识中不应道理,此对治识自性解脱故,与余烦恼及随烦恼不俱生灭故。复于后时世间识生,尔时若离阿赖耶识,彼诸熏习及所依止久已过去,现无体故,.应无种子而更得生。是故若离阿赖耶识,烦恼杂染皆不得成。

2云何为业杂染不成?行为缘识不相应故。此若无者,取为缘有亦不相应。

³云何为生杂染不成?结相续时不相应故。若有于此非等引地没已生时,依中有位意起染污意识结生相续,此染污意识于此中有中灭,于母胎中识羯罗蓝更相和合。若即意识与彼和合,既和合已,依止此识于母胎中有意识转,若尔即应有二意识于母胎中同时而转。又即与彼和合之识是意识性不应道理,⁴依染污故,时无断故,意识所缘不可得故。设和合识即是意识,为此和合意识即是一切种子识,为依止此识所生余意识是一切种子识?若此和合识是一切种子识,即是阿赖耶识,汝以异名立为意识。若能依止识是一切种子识,是则所依因识非一切种子识,能依果识是一切种子识,不应道理。是故成就此和合识非是意识,但是异熟识,是一切种子识。

复次,结生相续已,⁵若离异熟识,执受色根亦不可得,其余诸识各别依故,不坚住故。是诸色根不应离识。若离异熟识,识与名色更互相依,譬如芦束相依而转,此亦不成。若离异熟识,已生有情识食不成,何以故?以六识中随取一识于三界中已生有情能作食事不可得故。若从此没,于等引地正受生时,由非等引染污意识结生相续,此非等引染污之心彼地所摄,离异熟识余种子体定不可得。

复次,生无色界若离一切种子异熟识,⁶染污善心应无种子,染污善心应无依持。又即于彼若出世心正现在前,余世间心皆灭尽故,尔时便应灭离彼趣。若生非想非非想处、无所有处,出世间心现在前时,即应二趣悉皆灭离,此出世识不以非想非非想处为所依趣,亦不应以无所有处为所依趣,亦非涅盘为所依趣。又将没时,造善造恶,或下或上,所依渐冷,若不信有阿赖耶识,皆不得成。是故若离一切种子异熟识者,此生杂染亦不得成。

⁷云何世间清净不成?谓未离欲缠贪、未得色缠心者,即以欲缠善心为离欲缠贪故勤修加行,此欲缠加行心与色缠心不俱生灭故,非彼所熏为彼种子,不应道理。又色缠心过去多生余心间隔,不应为今定心种子,唯无有⁸故。是故成就色缠定心,一切种子异熟果识展转传来为今因缘,加行善心为增上缘,如是一切离欲地中如应当知,如是世间清净若离一切种子异熟识理不得成。

⁹云何出世清净不成?谓世尊说,依他言音及内各别如理作意,由此为因正见得生。¹⁰此他言音如理作意为熏耳识,为熏意识,为两俱熏?若于彼法如理思

¹識本此二句云:"識由煩惱隨煩惱成染者,最初生時應無種子而生,彼熏習及所依並已過去無有故。"

²以下隋本第一品內業染章第十二。

³以下隋本生染章第十三。

⁴藏本合二句爲一云:"於恆久時爲染汙依故。"隋本同。

⁵藏本此二句云: "無有離彼餘異熟識能執持色根。"

⁶藏本此二句云:"諸生彼而有染汙善心者,此染善心應無種無依。"魏本同。

⁷以下隋本第一品內世間淨章第十四。

⁸藏本此下云:"如是一切離欲種子如應當知。"

⁹以下隋本出世淨章第十五。

¹⁰藏本此語云:"此由他言音之如理作意。"

惟,尔时耳识且不得起,意识亦为种种散动余识所间,若与如理作意相应生时,此闻所熏意识与彼熏习久灭过去定无有体,云何复为种子能生后时如理作意相应之心?又此如理作意相应是世间心,彼正见相应是出世心,曾未有时俱生俱灭,是故此心非彼所熏。既不被熏,为彼种子,不应道理,是故出世清净若离一切种子异熟果识亦不得成,「此中闻熏习摄受彼种子不相应故。

复次,云何一切种子异熟果识为杂染因,复为出世能对治彼净心种子?又出世心昔未曾习故,彼熏习决定应无。既无熏习,从何种生?是故应答:从最清净法界等流正闻熏习种子所生。此闻熏习为是阿赖耶识自性,为非阿赖耶识自性?若是阿赖耶识自性,云何是彼对治种子?若非阿赖耶识自性,此闻熏习种子所依云何可见,乃至证得诸佛菩提?此闻熏习随在一种所依转处²寄在异熟识中,与彼和合俱转,犹如水乳,然非阿赖耶识,是彼对治种子性故。此中依下品熏习成中品熏习,依中品熏习成上品熏习,依闻思修³多分修作得相应故。又此正闻熏习种子下中上品应知亦是法身种子,⁴与阿赖耶识相违,非阿赖耶识所摄。是出世间最净法界等流性故,虽是世间而是出世心种子性。又出世心虽未生时,已能对治诸烦恼缠,已能对治诸崄恶趣,已作一切所有恶业朽坏对治,又能随顺逢事一切诸佛菩萨。虽是世间,应知初修业菩萨所得亦法身摄,声闻独觉所得唯解脱身摄。又此熏习非阿赖耶识,是法身、解脱身摄。如如熏习下中上品次第渐增,如是如是异熟果识次第渐减,即转所依。既一切种所依转已,⁵即异熟果识及一切种子无种子而转,一切种永断。

复次,云何犹如水乳,非阿赖耶识与阿赖耶识同处俱转,而阿赖耶识一切种尽,6非阿赖耶识一切种增?譬如于水鹅所饮乳,又如世间得离欲时,非等引地熏习渐减.,其等引地熏习渐增,而得转依。7又入灭定识不离身圣所说故,此中异熟识应成不离身,非为治此灭定生故。又非出定此识复生,由异熟识既间断已离结相续无重生故。8又若有执以意识故灭定有心,此心不成,定不应成故,所缘行相不可得故,9应有善根相应过故,不善无记不应理故,应有想受现行过故,触可得故,于三摩地有功能故,应有唯灭想过失故,应有其思信等善根现行过故,拔彼能依令离所依不应理故,有譬喻故,如非徧行此不有故。10又此定中由意识故执有心者,此心是善不善无记皆不得成,故不应理。若复有执色心无间生是诸法种子,此不得成,如前已说。又从无色无想天没灭定等出,不应道理。又阿罗汉后心不成,唯可容有等无间缘。如是若离一切种子异熟果识,杂染清净皆不得成,是故成就如前所说相阿赖耶识决定是有。此中三颂:

菩萨于净心,远离于五识,无余心转依,云何汝当作?

¹藏本此句云:"此中由聞熏習與攝持種子不相應故。"今譯攝受卽上云攝持也。

²藏本此句云:"以和合相於異熟識中轉。"無寄字。三本並同。今譯取意增文。

³藏本此語云:"多時所作相應故。"

⁴藏本此句云:"由是阿賴耶識對治故,非阿賴耶識自性。"陳本同。

⁵藏本此二句云:"即異熟識之一切種子成無種子,而一切類皆斷。"陳隋本同。今譯一切類亦作一切種,因之文晦。

⁶藏本缺此語。

⁷以下隋本第一品內順道理章第十六。

⁸魏本缺此一大段,但有次下"又此定中由意識故"一段。

 $^{^9}$ 藏本此下二句互倒云:"由不善及無記非理,當成善根相應故。"又缺下"應有想受"至"善根現行過故"五句。

¹⁰藏本缺此一句,陳隋本並缺此一段。勘世親釋云,"今當略顯第二頌(誦)義",即引此文詳釋,可證此是別傳之論本。故魏本有此段卽無前段,陳隋本有前段卽無此段,皆不並行。今譯殆依晚出之本,故二誦俱出。藏本亦同。

若对治转依,¹非断故不成,果因无差别,于永断成过。 无种或无体,若许为转依,²无彼二无故 转依不应理。

³复次,此阿赖耶识差别云何?略说应知或三种或四种。此中三种者,谓三种熏习差别故,一名言熏习差别,二我见熏习差别,三有支熏习差别。四种者,一引发差别,二异熟差别,三⁴缘相差别.四相貌差别。此中引发差别者谓新起熏习,此若无者,行为缘识、取为缘有应不得成。此中异熟差别者谓行有为缘于诸趣中异熟差别,此若无者,则无种子,后有诸法生应不成。此中缘相差别者⁵谓即意中我执缘相,此若无者,染污意中我执所缘应不得成。此中相貌差别者,谓即此识有共相,有不共相,无受生种子相,有受生种子相等。共相者谓器世间种子,不共相者谓各别内处种子,⁶共相即是无受生种子,不共相即是有受生种子。对治生时,唯不共相所对治灭,共相为他分别所持但见清净,如瑜伽师于一物中种种胜解种种所见皆得成立。此中二颂:

难断难徧知,应知名共结,瑜伽者心异,由外相大故。 净者虽不灭,而于中见净,又清净佛土,由佛见清净。

7复有别颂,对前所引种种胜解种种所见皆得成立:

诸瑜伽师于一物,种种胜解各不同,种种所见皆得成,故知所取唯有识。

此若无者,诸器世间有情世间生起差别应不得成。复有麤重相及轻妄相,麤重相者谓烦恼随烦恼种子,轻妄相者谓有漏善法种子。此若无者,所感异熟无所堪能有所堪能所依差别应不得成。复有有受尽相无受尽相,有受尽相者谓已成熟异熟果善不善种子,无受尽相者谓名言熏习种子无始时来种种戏论⁸流转种子故。此若无者,已作已作善恶二业与果受尽应不得成,又新名言熏习生起应不得成。复有譬喻相,谓此阿赖耶识幻焰梦翳为譬喻故。此若无者,由⁹不实徧计种子故颠倒缘相应不得成。复有具足相不具足相,谓诸具缚者名具足相,世间离欲者名损减相,有学声闻及诸菩萨名一分永拔相,阿罗汉、独觉及诸如来名烦恼障¹⁰全永拔相及烦恼所知障全永拔相如其所应。此若无者,如是¹¹次第杂染还灭应不得成。何因缘故,善不善法能感异熟,其异熟果无覆无记?由异熟果无覆无记与善不善互不相违,善与不善互相违故。若异熟果善不善性,杂染还灭应不得成,是故异熟识唯无覆无记。

摄大乘论本卷第一

¹藏本此二句云:"彼若卽是斷,應因果無異。"

²藏本云:"於彼無無二。"陳本同。又與無性合。

³以下陳本第一分內差別品第四,隋本第一品內差別章第十七。

⁴勘藏本此即相字解作因者,故別以緣相譯之。

⁵藏本此句云:"即彼由意執我之因。"

⁶藏本此句在次二頌下始出,文義更順。魏隋本同。

⁷藏本缺此句並次頌,魏本同,疑此云"別頌"亦是別傳之論本也。但陳、隋本有文,僅缺"對前所引"至 "皆得成立"一句。

⁸藏本此語作所起種子,陳隋本同。

⁹勘藏本此即虚妄分別種子,三本並同。

¹⁰原刻作令, 今依藏本及麗刻改。

¹¹藏本此語作"雜染次第還滅應不得成"。

摄大乘论本卷第二

无着菩萨造 唐三藏法师玄奘奉诏译

1所知相分第三

已说所知依,²所知相复云何应³见?此略有三种:一、依他起相;二、徧计所执相;三、圆成实相。此中何者依他起相?谓阿赖耶识为种,虚妄分别所摄诸⁴识。此复云何?谓身、身者、受者识,彼所受识,彼能受识,世识,数识,处识,言说识,自他差别识,善趣恶趣死生识。此中若身、身者、受者识,彼所受识、彼能受识、世识、数识、处识、言说识,此由名言熏习⁵种子。若自他差别识,此由我见熏习种子。若善趣恶趣死生识,此由有支熏习种子。由此诸识,一切界趣杂染所摄依他起相虚妄分别皆得显现。如此诸识皆是虚妄分别所摄,⁶唯识为性.,是无所有,非真实义显现所依,如是名为依他起相。此中何者徧计所执相?谓于无义唯有识中⁷似义显现。此中何者圆成实相,谓即于彼依他起相,由似义相,永无有性。

此中身、身者、受者识应知即是眼等六内界,彼所受识应知即是色等六外界,彼能受识应知即是眼等六识界,其余诸识应知是此诸识差别。又此诸识⁸皆唯有识,都无义故。此中以何为喻显示?应知梦等为喻显示,谓如梦中都无其义,独唯有识,虽种种色、声、香、味、触、舍、林、地、山似义显现,而于此中都无有义。由此⁹喻显,应随了知一切时处皆唯有识。由此等言,应知复有幻诳、鹿爱、翳眩等喻。若于觉时一切时处皆如梦等唯有识者,如从梦觉便觉梦中皆唯有识,觉时何故不如是转?真智觉时亦如是转。如在梦中此觉不转,从梦觉时此觉乃转,如是未得真智觉时此觉不转,得真智觉此觉乃转。

其有未得真智觉者,于唯识中云何比知?由教及理应可比知。此中教者,如《十地经》薄伽梵说:"如是三界,皆唯有心。"又薄伽梵《解深密经》亦如是说,谓彼经中慈氏菩萨问世尊言:"诸三摩地所行影像,彼与此心当言有异当言无异?"佛告慈氏:"当言无异。何以故?由彼影像唯是识故,我说识所缘唯识所现故。""世尊!若三摩地所行影像即与此心无有异者,云何此心还取此心?""慈氏,无有少法能取少法,10然即此心如是生时即有如是影像显现,如质为缘还见本质,而谓我今见于影像及谓离质别有所见影像显现。此心亦尔,如是生时相似有异所见影现。"即由此教。理亦显现。所以者何?于定心中,随所观见诸青瘀等所知影像,一切无别青瘀等事,但见自心。由此道理,菩萨于其一切识中应可比知,皆唯有识,无有境界。又于如是青瘀等中非忆持识见所缘境现前住故,闻思所成二忆持识亦以过去为所缘故,所现影像得成唯识。由此比量,菩萨虽未得真智觉.,于唯识中应可比知。

[「]以下魏本不分品,陳本作應知勝相第二,隋本作應知勝相勝語第二。又分四章,此相章第一。

²以下藏本第二卷,末題所知相品第二,但前後文皆不分品,獨題此品,未詳何以。

³原刻作觀,今依藏本及二釋改。

⁴藏本此字作了別 rnam-par□ig-pa, 並不作識 rnam-par ces-pa, 今譯未加簡別。

⁵藏本此語云。"種子而生故。"三本均同。次二句例知。

⁶勘藏本此語"即唯識性",下文亦單譯作"唯識"。

 $^{^7}$ 藏本此語云:"顯現爲義者,此云顯現。"原作 8 snan%- 8 ba,無性釋爲明了是也。今譯取意分爲似現二語.下文均同.

⁸藏本此語文倒云: "無義故唯識者。"

⁹原刻作唯字,今依藏本及麗刻改。

¹⁰藏本此句云: "然即如彼生起之心如是顯現。"

如是已说种种诸识如梦等喻,即于此中眼¹识等识可成唯识。眼等诸识既是有色,亦唯有识云何可见?此亦如前由教及理。若此诸识²亦体是识,何故乃似色性显现,一类坚住,相续而转?与颠倒等诸杂染法为依处故。若不尔者,于非义中起义颠倒应不得有。此若无者,烦恼所知二障杂染应不得有。此若无者,诸清净法亦应无有。是故诸识应如是转。此中有颂:

乱3相及乱体,应许为色识,及与非色识,4若无余亦无。5

何故身、身者、受者识、所受识、能受识于一切身中俱有和合转?能圆满生受用所显故。何故⁶如说世等诸识差别而转?无始时来生死流转无断绝故,诸有情界无数量故,诸器世界无数量故,诸所作事展转言说无数量故,各别摄取受用差别无数量故,诸爱非爱业果异熟受用差别无数量故,所受死生种种差别无数量故。

复次,云何安立如是诸识成唯识性?略由三相:一、由⁷唯识,无有义故;二、由二性,⁸有相有见二识别故;三、由⁹种种,种种行相而生起故。所以者何?此一切识无有义故,得成唯识;¹⁰有相见故,得成二种:若眼等识,以色等识为相,以眼识识为见乃至以身识识为见;若意识,以一切眼为最初、法为最后诸识为相,以意识识为见。由此意识有分别故,¹¹似一切识而生起故。此中有颂:

唯识二种种,观者意能入,由悟入唯心,彼亦能伏离。

又于此中有一类师说一意识¹²被彼依转得彼彼名,如意思业名身语业。又于一切所依转时似种种相二影像转,谓唯义影像及分别影像。又一切处亦似所触影像而转,有色界中即此意识依止身故,如余色根依止于身。此中有颂:

若远行独行,无身寐于窟,调此难调心,我说真梵志。

又如经言:"如是五根所行境界,意各能受,意为彼依。"又如所说十二处中说六识身皆名意处。若处安立阿赖耶识识为¹³义识,应知此中余一切识是其相识。若意识识及所依止是其见识,由彼相识是此见识生¹⁴缘相故,似义现时能作见识¹⁵生依止事。如是名为安立诸识成唯识性。诸义现前分明显现而非是有云何可知?如

¹藏本此字亦作識,下等識之識則作了別,後文眼識識、身識識等均同此例。

²勘藏本此語仍作唯識性.即前文譯作唯識爲性者。

³藏本此字作因, 陳隋本同。

⁴藏本此二字作色無, 陳本同, 與二釋合。

⁵以下隋本第二品內差別章第二,魏本缺此問答二句。

⁶藏本此二字意云如上所說。

⁷藏本此二字作唯彼 de-tsam,魏隋本同,於義更順。今譯改文。次下各段例知。

⁸藏本此句云:"識相與見俱故。"與無性合。

⁹藏本此語作"由種種俱起",與無性合。

¹⁰藏本此句在"身識識爲見"下,釋成由二性,文義更明。

¹¹藏本此句云:"由一切了別顯現而生故。"意異。又似字原刻作以,今依藏本及麗刻改。

¹²藏本此語云:"由彼彼依起而得彼彼名。"

¹³勘藏本此是境義 don, 魏本作"塵識是也", 無性解作因義。

¹⁴勘藏本相識之相與此緣相均作 rgyu-mtshan, 蓋一字二義,或云相,或云因。今文互訓云:"以緣相故爲相識也。"

¹⁵藏本此語云:"生起依止之所作事。"

世尊言:"若诸菩萨成就四法,能随悟入一切唯识,都无有义:一者成就相违识相智,如饿鬼、傍生及诸天人同于一事见,彼所识有差别故;二者成就无所缘识现可得智,如过去、未来梦影缘中有所得故;三者成就应离功用无颠倒智,如有义中能缘义识应无颠倒,不由功用知真实故;四者成就三种胜智随转妙智。何等为三?一得心自在,一切菩萨得静虑者,随胜解力诸义显现;二得奢摩他修法观者,纔作意时诸义显现;三已得无分别智者,无分别智现在前时一切诸义皆不显现。由此所说三种胜智随转妙智及前所说三种¹因缘,诸义无义道理成²就。3

若依他起自性实唯有识,似义显现之所依止,云何成依他起?何因缘故名依他起?从自熏习种子所生,⁴依他缘起故,名依他起;生刹那后无有功能自然住故,名依他起。⁵

若徧计所执自性依依他起,实无所有,似义显现,云何成徧计所执?何因缘故名徧计所执?无量行相意识徧计颠倒生⁶相⁷故,名徧计所执;自相实无,唯有⁸徧计所执可得,是故说名徧计所执。

若圆成实自性是徧计所执永无有相,云何成圆成实?何因缘故名圆成实?由无变异性⁹故,名圆成实;又由清净所缘性故,一切善法最胜性故,由最胜义名圆成实。

复次,有能徧计、有所徧计,徧计所执自性乃成,此中何者能徧计?何者所徧计?何者徧计所执自性?当知¹⁰意识是能徧计,有分别故。所以者何?由此意识用自名言熏习为种子及用一切识名言熏习为种子,是故意识无边行相分别而转,普于一切分别计度,故名徧计。又依他起自性名所徧计。又若¹¹由此相令依他起自性成所徧计,此中是名徧计所执自性。由此相者,是如此义。

复次,云何徧计能徧计度?缘何境界?取何相貌?由何执着?由何起语?由何言说?何所增益?谓缘名为境,于依他起自性中取彼相貌,由见执着,由寻起语,由见闻等四种言说而起言说,于无义中增益为有,由此偏计能徧计度。

复次,此三自性为异为不异?应言非异非不异。谓依他起自性由异门故,成依他起;即此自性由异门故,成徧计所执;即此自性由异门故,成圆成实。由何异门,此依他起成依他起?依他熏习种子起故。由何异门,即此自性成徧计所执?由是徧计¹²所缘相故;¹³又是徧计所徧计故。由何异门,即此自性成圆成实?如所徧计毕竟不如是有¹⁴故。¹⁵

此三自性各有几种? 谓依他起略有二种: 一者依他熏习种子而生起故; 二者

¹勘藏本此是宗因之因 gtan-tshigs,非因緣也。

²藏本此下有六頌云,"鬼傍生人天"等,即下增上慧學分所出。陳隋本大同,但云應說六偈皆如後說,不出頌文。

³以下隋本第二品內分別章第三。

⁴藏本此句云: "是故爲緣他而起。"此答上問"云何成依他"也。三本同。今譯云故名,與下答第二問無異,疑誤。

⁵藏本此句云:"若依彼之義無而顯現爲遍計自性者。"今譯似字即係原文顯現意譯所加,已見前註。

⁶勘藏本此字即是緣相,無性解作因也。

⁷藏本此句云:"故爲遍計自性。"三本並同。答上第一問也。今譯疑誤。

⁸藏本此語但作遍計 kun-tu rtog-pa,無所執意。陳隋本同。

⁹藏本此句云:"故爲圓成實。"答上第一問也。三本並同。今譯疑誤。

¹⁰藏本此語用第六轉聲,作意之識,與上文解種種行相識爲第六意識相合。但勘《成唯識論》卷六引用此文,亦解作意與識,未詳何據。

¹¹藏本此三句云:"由彼相以遍計依他性者爲遍計性。"由彼即是如彼之義。

¹²藏本此語云緣相,解作因義。三本同。今譯所緣,從世親。

¹³藏本此句云:"由彼 des 而遍計故。"與上因義相成。

¹⁴陳隋本次有一段問答"何義由此一識成一切種種識相"?勘即前文安立賴耶爲義識一段復出。

¹⁵藏本但問依他有幾。三本同。

依他杂染清净性不成故。由此二种依他别故,名依他起。徧计所执亦有二种:一者自性徧计执故;二者差别徧计执故。由此故名徧计所执。圆成实性亦有二种:一者自性圆成实故;二者清净圆成实故。由此故成圆成实性。

复次,徧计有四种:一、自性徧计;二、差别徧计;三、有觉徧计;四、无觉徧计。有觉者谓善名言,无觉者谓不善名言。如是徧计复有五种:一、依名徧计义自性,谓如是名有如是义;二、依义徧计名自性,谓如是义有如是名;三、依名徧计名自性,谓徧计度未了义名;四、依义徧计义自性,谓徧计度未了名义;五、依二徧计二自性,谓徧计度此名此义如是体性。

复次,总摄一切分别略有十种:一、根本分别,谓阿赖耶识。二、¹缘相分别,谓色等识。三、显相分别,谓眼识等并所依识。四、缘相变异分别,谓老等变异,乐受等变异,贪等变异,逼害时节代谢等变异,捺落迦等诸趣变异,及欲界等诸界变异。五、显相变异分别,谓即如前所说变异所有变异。六、他²引分别,谓闻非正法类及闻正法类分别。七、不如理分别,谓诸外道闻非正法类分别。八、如理分别,谓正法中闻正法类分别。九、执着分别,谓不如理作意类,萨迦耶见为本,六十二见趣相应分别。十、散动分别,谓诸菩萨十种分别:一、³无相散动;二、有相散动;三、增益散动;四、损减散动;五、一性散动;六、异性散动;七、自性散动;八、差别散动;九、如名取义散动;十、如义取名散动。⁴为对治此十种散动,一切般若波罗蜜多中说无分别智,如是所治能治应知具摄般若波罗蜜多义。

若由异门依他起自性有三自性,云何三自性不成无差别?若由异门成依他起,不即由此成徧计所执及圆成实;若由异门成徧计所执,不即由此成依他起及圆成实;若由异门成圆成实,不即由此成依他起及徧计所执。

复次,⁵云何得知如依他起自性、徧计所执自性显现而非称体?由名前觉无,称体相违故;由名有众多,多体相违故;由名不决定,杂体相违故。此中有二颂:

由名前觉无,多名不决定,成称体多体,杂体相违故。 法无而可得,无染而有净,应知如幻等,亦复似虚空。

复次,何故如所显现实无所有,而依他起自性非一切一切都无所有?此若无者,圆成实自性亦无所有;此若无者,则一切皆无。若依他起及圆成实自性无有,应成无有染净过失,既现可得杂染清净,是故不应一切皆无。此中有颂:

6若无依他起,圆成实亦无,一切种若无,恒时无染净。

诸佛世尊于大乘中说方广教,彼教中言:"云何应知徧计所执自性?⁷应知异门说 无所有。云何应知依他起自性?应知譬如幻焰、梦影、光影、谷响、水月、变化。 云何应知圆成实自性?应知宣说四清净法。何等名为四清净法?一者自性清净, 谓真如、空、实际、无相、胜义、法界;二者离垢清净,谓即此离一切障垢;三

¹勘藏本此二字但作相 mtshan-ma,與前文云緣相 rgyu-mtshan 者異,今譯雜用無別。

²原刻作別,今依藏本及麗刻改。

³無相有相,勘藏本云:"無體之相,有體之相。"

⁴藏本此處廣引《大般若經》"云何菩薩行於般若"一大段。陳隋本同。

⁵藏本此三句頌作二句云"依他及圓成,一切若非有",無次第而無之義,攝長行不全也。魏本同。

⁶藏本此句云:"由何得知依他自性如遍計自性顯現而非即彼自體耶?"

⁷藏本此句云:"由無所有異門而說。"

者得此道清净,谓一切菩提分法波罗蜜多等;四者¹生此境清净,谓诸大乘妙正法教,由此法教清净²缘故非徧计所执自性,最净法界等流性故非依他起自性。如是四法总摄一切清净法尽。此中有二颂:

幻等说于³生,说无计所执,若说四清净,是谓圆成实。 自性与离垢,清净道所缘,一切清净法,皆四相所摄。

复次,何缘如经所说,于依他起自性说幻等喻?于依他起自性为除他⁴虚妄疑故。他复云何于依他起自性有虚妄疑?由他于此有如是疑:云何实无有义而成所行境界?为除此疑,说幻事喻。云何无义心心法转?为除此疑,说阳焰喻。云何无义有爱非爱受用差别?为除此疑,说所梦喻。云何无义净不净业、爱非爱果差别而生?为除此疑,说影像喻。云何无义种种识转?为除此疑,说光影喻。云何无义种种戏论言说而转?为除此疑,说谷响喻。云何无义而有⁵实取诸三摩地所行境转?为除此疑,说水月喻。云何无义有诸菩萨无颠倒心为办有情诸利乐事故思受生?为除此疑,说变化喻。世尊依何密意于《梵问经》中说如来不得生死不得涅盘? ⁶于依他起自性中,依徧计所执自性及圆成实自性生死涅盘无差别密意。何以故?即此依他起自性,由徧计所执分成生死,由圆成实分成涅盘故。

《阿毗达磨大乘经》中薄伽梵说法有三种:一、杂染分; 二、清净分; 三、彼二分。依何密意作如是说? ⁷于依他起自性中,徧计所执自性是杂染分,圆成实自性是清净分,即依他起是彼二分。依此密意作如是说。于此义中以何喻显?以金土藏为喻显示。譬如世间⁸金土藏中三法可得:一、地界; 二、土; 三、金。于地界中,土非实有而现可得; 金是实有而不可得; 火烧炼时,土相不现,金相显现。又此地界,土显现时,虚妄显现; 金显现时,真实显现。是故地界是彼二分。识亦如是,无分别智火未烧时,于此识中所有虚妄徧计所执自性显现,所有真实圆成实自性不显现。此识若为无分别智火所烧时,于此识中所有真实圆成实自性显现,所有虚妄徧计所执自性不显现。是故此虚妄分别识依他起自性有彼二分,如金土藏中所有地界。

世尊有处说一切法常,有处说一切法无常,有处说一切法非常非无常,依何密意作如是说?谓依他起自性由圆成实性分是常,由徧计所执性分是无常,由彼二分非常非无常,依此密意作如是说。如常无常无二,如是苦乐无二,净不净无二,空不空无二,我无我无二,寂静不寂静无二,有自性无自性无二,生不生无二,灭不灭无二,本来寂静非本来寂静无二,自性涅盘非自性涅盘无二,生死涅盘无二亦尔。如是等差别一切诸佛密意语言,由三自性应随决了,如前说常无常等门。此中有多颂:

如法实不有,如现非一种,⁹非法非非法,故说无二义。 依一分开显,或有或非有,依二分说言,非有非非有。

[「]藏本此語作"生彼故所緣清淨"。

²藏本此字作因 rgyu。

³藏本此字作緣生。

⁴藏本此語作於虚妄疑惑,與無性合。

⁵藏本此語作取真實。

⁶藏本此句云: "從依他自性爲遍計及圓成故流轉涅槃性無差別而說。"

⁷藏本此三句云:"依他性中有遍計性者屬於雜染分,有圓成性者屬於清淨分,即彼依他屬於彼二分。"

⁸藏本此語直譯云:"如土中有金者。"

⁹藏本此句云:"如是法非法。"結成上二句。魏本同。

如显现非有,是故说为无,由如是显现,是故说为有。 自然自体无,自性不坚¹住.,如执取不有,故许无自性。 由无性故成,后后所依止,无生灭本寂,自性般涅盘。

²复有四种意趣、四种秘密,一切佛言应随决了。四意趣者:一、平等意趣,谓如说言我昔曾于彼时彼分即名胜观正等觉者。二、别时意趣,谓如说言若诵多宝如来名者,便于无上正等菩提已得决定;又如说言由唯发愿,便得往生极乐世界。三、别义意趣,谓如说言若已逢事尔所殑伽河沙等佛,于大乘法方能解义。四、补特伽罗意乐意趣,谓如为一补特伽罗先赞布施后还毁訾,如于布施,如是尸罗及一分修当知亦尔。如是名为四种意趣。四秘密者:一、令入秘密,谓声闻乘中或大乘中,依世俗谛理说有补特伽罗及有诸法自性差别;二、相秘密,谓于是处说诸法相显三自性;三、对治秘密,谓于是处说行对治八万四千;四、转变秘密,谓于是处以其别义诸言诸字即显别义。如有颂言:

3觉不坚为坚,善住于颠倒,极烦恼所恼,得最上菩提。

⁴若有欲造大乘法释,略由三相应造其释:一者由说缘起;二者⁵由说从缘所生法相;三者由说语义。此中说缘起者,如说⁶言熏习所生诸法,此从彼异熟与转识更互为缘生。

⁷复次,彼转识相法有相有见,识为自性。又彼以依处为相,徧计所执为相, 法性为相,由此显示三自性相,如说从有相有见,应知彼三相。

复次,云何应释彼相?谓徧计所执相于依他起相中实无所有,圆成实相于中实有。8由此二种非有及有、非得及得、未9见已见真者同时,谓于依他起自性中无徧计所执故,有圆成实故,于10此转时,若得彼即不得此,若得此即不得彼。如说:"依他所执无,成实于中有,故得及不得,其中二平等。"

说语义者,谓先说初句,后以余句分别显示,或由德处,或由义处。由德处者,谓说:佛功德最清净觉,不二现行,趣无相法,住于佛住,逮得一切佛平等性,到无障处,不可转法,所行无碍,其所安立不可思议,游于三世平等法性,其身流布一切世界,于一切法智无疑滞,于一切行成就大觉,于诸法智无有疑惑,凡所现身不可分别,一切菩萨等所求智,得佛无二住胜彼岸,不相间杂如来解脱妙智究竟,证无中边佛地平等,极于法界,尽虚空性,穷未来际。最清净觉者,应知此句由所余句分别显示,如是乃成善说法性。最清净觉者,谓佛世尊最清净觉,应知是佛¹¹二十一种功德所摄,谓于所知一向无障转功德,于有无无二相真

¹原刻作位,今依藏本及麗刻改。

²以下隋本第二品內四意四合義章第四。

³陳隋本此頌具出音譯曰"阿娑離沙羅摩多耶"云云。

⁴藏本此句云:"若欲釋大乘之法者。"

⁵藏本此句云:"由說諸緣起法之相。"

⁶藏本此二句云,"諸法從言熏習生,即從彼等而有此",是乃引頌,餘二句則是長行釋。文云: "異熟與轉 識互爲緣而起故。"陳隋本同。與世親亦合。今譯疑誤。

⁷勘陳本此句云,"廣解釋依因緣已生諸法實相者,諸法者謂生起識爲相"云云。隋本大同。故此下是說緣起法相也。

⁸藏本此句云:"由未見及見真實者同時彼二或有或無,或可得或不可得。"

⁹原刻作具,今依藏本及麗刻改。次同。

¹⁰此依藏本及麗刻加。

¹¹藏本作十九種,魏本同,以能入真如及佛事不休息合爲一德,又常現利樂及無盡合爲一德,故成十九。

如最胜清净能入功德,无功用佛事不休息住功德,于法身中所依意乐作业无差别功德,修一切障对治功德,降伏一切外道功德,生在世间不为世法所碍功德,安立正法功德,授记功德,于一切世界示现受用变化身功德,断疑功德,令入种种行功德,当来法生妙智功德,如其胜解示现功德,无量所依调伏有情加行功德,平等法身波罗蜜多成满功德,随其胜解示现差别佛土功德,三种佛身方处无分限功德,穷生死际常现利益安乐一切有情功德,无尽功德等。

复次,由义处者,如说:若诸菩萨成就三十二法乃名菩萨,谓于一切有情起 利益安乐增上意乐故,令入一切智智故,自知我今何假智故,摧伏慢故,坚牢胜 意乐故,非假怜愍故,于亲非亲平等心故,永作善友乃至涅盘为后边故,应量而 语故,含笑先言故,无限大悲故,于所受事无退弱故,无厌倦意故,闻义无厌故, 于自作罪深见过故,于他作罪不瞋而诲故,于一切威仪中恒修治菩提心故,不悕 异熟而行施故,不依一切有趣受持戒故,于诸有情无有恚碍而行忍故,为欲摄受 一切善法勤精进故,舍无色界修静虑故,方便相应修般若故,由四摄事摄方便故, 于持戒破戒善友无二故,以殷重心听闻正法故,以殷重心住阿练若故,于世杂事 不爱乐故,于下劣乘曾不欣乐故,于大乘中深见功德故,远离恶友故,亲近善友 故,恒修治四梵住故,常游戏五神通故,依趣智故,于住正行不住正行诸有情类 不弃舍故,言决定故,重谛实故,大菩提心恒为首故。如是诸句应知皆是初句差 别,谓于一切有情起利益安乐增上意乐。此利益安乐增上意乐句有十六业差别应 知,此中十六业者:一、展转加行业;二、无颠倒业;三、不待他请自然加行业; 四、不动坏业: 五、无求染业,此有三句差别应知,谓无染系故,于恩非恩无爱 恚故,于生生中恒随转故;六、相称语身业,此有二句差别应知;七、于乐于苦 于无二中平等业; 八、无下劣业; 九、无退转业; 十、摄方便业; 十一、厌恶所 治业,此有二句差别应知:十二、无间作意业:十三、胜进行业,此有七句差别 应知,谓六波罗蜜多正加行故,及四摄事正加行故;十四、成满加行业,此有六 句差别应知,谓亲近善士故,听闻正法故,住阿练若故,离恶寻思故,作意功德 故,此复有二句差别应知,助伴功德故,此复有二句差别应知;十五、成满业, 此有三句差别应知,谓无量清净故,得大威力故,证得功德故;十六、安立彼业, 此有四句差别应知,谓御众功德故,决定无疑教授教诫故,财法摄一故,无杂染 心故。如是诸句应知皆是初句差别,如说:"由最初句故,1句别德种类;由最初 句故, 句别义差别。"

2入所知相分第四

³如是已说所知相,入所知相云何应见?多闻熏习所依、非阿赖耶识所摄、⁴如阿赖耶识成种子、如理作意所摄似法似义而生似所取事有见⁵意言。

此中谁能悟入所应知相?⁶大乘多闻熏习相续,已得逢事无量诸佛出现于世, 已得一向决定胜解,已善积集诸善根故,善备福智资粮菩萨。

但勘藏本無明文。

¹藏本此句云:"隨德句差別。"陳隋本同。頌末句例知。

²以下藏本第三卷,不分品,魏本同,陳本作應知入勝相第三,隋本作入應知勝相勝語第三。

³魏本以此句判屬上卷,以下乃爲下卷。

⁴藏本此二句云:"如阿賴耶識,爲諸如理作意所攝,顯現法義而起,猶如所取事之所依,有見意言之種子。" 今譯義異。

⁵陳本此二字作意言分別,藏本下文亦作意分別,與世親釋爲意地尋思相合。

⁶藏本此句云:"心相續由多聞大乘法所熏習。"

何处能入?谓即于彼有见似法似义意言,¹大乘法相等所生起胜解行地、见道、修道、究竟道中。于一切法唯有识性随闻胜解故,如理通达故,²治一切障故,离一切障故。

由何能入?由善根力所任持故,谓三种相练磨心故,断四处故,缘法义境止 观恒常殷重加行无放逸故。无量诸世界无量人有情刹那刹那证觉无上正等菩提, 是为第一练磨其心。由此意乐能行施等波罗蜜多:我已获得如是意乐,我由此故, 少用功力修习,施等波罗蜜多当得圆满,是为第二练磨其心。若有成就诸有障善, 于命终时即便可受一切自体圆满而生:我有妙善无障碍善,云何尔时不当获得一 切圆满?是名第三练磨其心。此中有颂:

> 人趣诸有情,处数皆无量,念念证等觉,故不应退屈。 诸净心意乐,能修行施等,此胜者已得,故能修施等。 善者于死时,得随乐自满,胜善由永断,圆满云何无?

³由离声闻独觉作意,断作意故。由于大乘诸疑离疑,以能永断异慧疑故。由离 所闻所思法中我我所执,断法执故。由于现前现住安立一切相中无所作意无所分 别,断分别故。此中有颂:

现前自然住,安立一切相,智者不分别,得最上菩提。

由何、云何而得悟入? 4由闻熏习种类如理作意所摄似法似义有见意言;由 四寻思,谓由名、义、自性、差别假立寻思;及由四种如实徧智,谓由名、事、 自性、差别假立如实徧智,5如是皆同不可得故。以诸菩萨如是如实为入唯识勤 修加行,即于似文似义意言推求文名唯是意言,推求依此文名之义亦唯意言,推 求名、义、自性、差别唯是假立。若时证得唯有意言,尔时证知若名、若义、自 性、差别皆是假立,自性差别义相无故同不可得。由四寻思及由四种如实徧智, 于此似文似义意言便能悟入6唯有识性。

于此悟入唯识性中,何所悟入,⁷如何悟入?入唯识性相见二性,及种种性若名、若义、自性差别假、自性差别义,如是六种义皆无故。所取能取性现前故,一时现似种种相义而生起故。⁸如闇中绳显现似蛇,譬如绳上蛇非真实,以无有故。若已了知彼义无者,蛇觉虽灭,绳觉犹在。若以微细品类分析,此又虚妄色、香、味、触为其相故。此觉为依,绳觉当灭。⁹如是于彼似文似义六相意言伏除非实六相义时,唯识性觉,犹如蛇觉亦当除遣,由圆成实自性觉故。如是菩萨悟入意言似义相故,悟入徧计所执性:悟入唯识故,悟入依他起性。

¹藏本此語云:"即由大乘因所生者。"與世親合。

²藏本此句云:"修一切障對治故。"與無性合。

³藏本此下四句文義皆倒,略謂"由斷作意故,斷聲聞獨覺作意"云云。

⁴藏本此語云:"由聞熏習因所生者。"

⁵藏本此句云:"由是等而入,皆不可得故。"答上"由何得入"問也。

⁶勘藏本此語仍作唯識性,即前文所譯唯識爲性唯識爲體。

⁷藏本此句云:"似何而悟入?"問譬喻也。陳隋本同。

⁸藏本此句云:"似暗穴中如蛇之繩而入。"答上"似何而入"問也。

⁹藏本此四句云:"如是依圓成自性覺故,於彼顯現文義六種義分別,猶如蛇覺。伏除六已,唯識想亦當滅。" 三本大同。今譯文倒,似以蛇覺喻於唯識。

云何悟入圆成实性?¹若已灭除意言闻法熏习种类唯识之想,尔时菩萨已遣义想,一切似义无容得生故,似唯识亦不得生。由是因缘住一切义无分别名,于法界中便得现见相应而住,尔时菩萨平等平等所缘能缘无分别智已得生起,由此菩萨名已悟入圆成实性。此中有颂:

法补特伽罗,法义略广姓,不净净究竟,2名所行差别。

如是菩萨³悟入唯识性故,悟入所知相。悟入此故,入极喜地,善达法界,生如来家,得一切有情平等心性,得一切菩萨平等心性,得一切佛平等心性。此即名为菩萨见道。

复次,为何义故入唯识性? ⁴由缘总法出世止观智故,由此后得种种相识智故,为断⁵及相阿赖耶识诸相种子,为长能触法身种子,为转所依,为欲证得一切佛法,为欲证得一切智智,入唯识性。又后得智于一切阿赖耶识所生一切了别相中见如幻等性无倒转,是故菩萨譬如幻师于所幻事、⁶于诸相中及说因果常无颠倒。

于此悟入唯识性时,有四种三摩地是四种顺决择分依止云何应知?应知由四寻思,于下品无义忍中有明得三摩地,是暖顺决择分依止;于上品无义忍中有明增三摩地,是顶顺决择分依止;复由四种如实徧智已入唯识,于无义中已得决定有入真义一分三摩地,是谛顺忍依止;从此无间伏唯识想有无间三摩地,是世第一法依止。应知如是诸三摩地是现观边。

如是菩萨已入于地、已得见道、已入唯识,于修道中云何修行?于如所说安立⁷十地,摄一切经皆现前中,由缘总法出世后得止观智故,经于无量百千俱胝 那庾多劫数修习故而得转依,为欲证得三种佛身精勤修行。

声闻现观菩萨现观有何差别?谓菩萨现观与声闻异由8十一种差别应知。一、由所缘差别,以大乘法为所缘故;二、由资持差别,以大福智二种资粮为资持故;三、由通达差别,以能通达补特伽罗、法无我故;四、由涅盘差别,摄受无住大涅盘故;五、由地差别,依于十地而出离故;六七、由清净差别,断烦恼习、净佛土故;八、由于自他得平等心差别,成熟有情加行无休息故;九、由生差别,生如来家故;十、由受生差别,常于诸佛大集会中摄受生故;十一、由果差别,十力、无畏、不共佛法无量功德果成满故。此中有二颂;

名事互为客,其性应寻思,于二亦当推,⁹唯量及唯假。 实智观无义,唯有分别三,彼无故此无,是即入三性。

复有教授二颂,如《分别瑜伽论》说:

菩萨于定位, 观影唯是心, 义想既灭除, 审观唯自想。

3藏本此句云:"於所知相悟入唯識性。"

¹藏本此句答云,"由唯識想亦除遣而入",以意言聞熏種類屬下一切似義句爲文。三本幷同。今譯文倒。

²藏本此句云:"由上差別爲名境。"

⁴此段依藏本句讀, 意云"爲由止觀智及此後得智而斷賴耶種子"云云。

⁵藏本此語云:"一切賴耶種子與緣相俱者。"陳隋本同。今譯諸相意指一切,文晦。

⁶藏本此句云:"於說有因果中恒無顛倒。"陳本同。

⁷藏本此語云:"菩薩十地經攝一切性皆現前中。"

⁸藏本作十種,以下六七合爲一種。魏隋本同。與無性云略有十種或十一種相合。

⁹藏本此語作唯彼,指唯識而言也。

如是住内心, 知所取非有, 次能取亦无, 后触无所得。

复有别五现观伽他,如《大乘经庄严论》说:

福德智慧二资粮,菩萨善备无边际,于法思量善决已,故了义趣唯¹言类。若知诸义唯是言,即住似彼唯心理,便能现证真法界,是故二相悉蠲除。体知离心无别物,由此即会心非有,智者了达二皆无,等住二无真法界。慧者无分别智力,周徧平等常顺行,灭依榛梗过失聚,如大良药销众毒。佛说妙法善成立,安慧²幷根法界中,了知念趣唯分别,勇猛疾归德海岸。

3彼入因果分第五

如是已说入所知相,彼入因果云何可见?谓由施、戒、忍、精进、静虑、般若六种波罗蜜多。云何由六波罗蜜多得入唯识?复云何六波罗蜜多成彼入果?谓此菩萨不着财位,不犯尸罗,于苦无动,于修无懈,于如是等散动因中不现行时心专一境,便能如理简择诸法,得入唯识。菩萨依六波罗蜜多入唯识已,证得六种清净增上意乐所摄波罗蜜多,是故于此设离六种波罗蜜多现起加行。由于圣教得胜解故,及由爱重随喜欣乐诸作意故,恒常无间相应方便修习六种波罗蜜多速得圆满。此中有三颂:

已圆满白法,及得利疾忍,菩萨于自乘,甚深广大教。 4等觉唯分别,得无分别智,悕求胜解净,故意乐清净。 5前及此法流,皆得见诸佛,了知菩提近,以无难得故。

⁶由此三颂总显清净增上意乐有⁷七种相,谓资粮故,堪忍故,所缘故,作意故, 自体故,瑞相故,胜利故。如其次第,诸句伽他应知显⁸示。

⁹何因缘故,波罗蜜多唯有六数?成立对治所治障故,证诸佛法所依处故,随顺成熟诸有情故。为欲对治不发趣因故,立施戒波罗蜜多。不发趣因,谓着财位,及着室家。为欲对治虽已发趣、复退还因故,立忍进波罗蜜多。退还因者,谓处生死有情违犯所生众苦,及于长时善品加行所生疲怠。为欲对治虽已发趣、不复退还而失坏因故,立定慧波罗蜜多。失坏因者,谓诸散动,及邪恶慧。如是成立对治所治障故,唯立六数。

又前四波罗蜜多是不散动因,次一波罗蜜多不散动成就,此不散动为依止故,如实等觉诸法真义便能证得一切佛法。如是证诸佛法所依处故,唯立六数。由施波罗蜜多故,于诸有情能正摄受。由戒波罗蜜多故,于诸有情能不毁害。由忍波罗蜜多故,虽遭毁害而能忍受。由精进波罗蜜多故,能助经营彼所应作。即由如是摄利因缘,令诸有情于成熟事有所堪任。从此已后,心未定者令其得定,心已

¹藏本此語云,"由言因起",與無性合。

²藏本此語云: "與根本俱之法界中。"

³藏本魏本不分品,陳本作入因果勝相第四,隋本作入因果勝相勝語第四又分十一章,此因果位章第一。

⁴藏本此二句末皆有故字,判爲兩種相。

⁵魏本缺前二頌,但有此一頌。

⁶魏本缺此長行一段。陳本同,但於釋論中具出其義。

⁷藏本作八種,作意故下有對治故一語,以頌"得無分別智"句當之,同無性論本。今譯從世親。

⁸藏本此下出末後唱柁南頌。

⁹以下隋本第四品內成立六數章第二。

定者令得解脱,于开悟时彼得成熟。如是随顺成熟一切有情唯立六数应如是知。

」此六种相云何可见?由六种最胜故。一、由所依最胜,谓菩提心为所依故; 二、由事最胜,谓具足现行故;三、由处最胜,谓一切有情利益安乐事为依处故; 四、由方便善巧最胜,谓无分别智所摄受故;五、由回向最胜,谓回向无上正等 菩提故;六、由清净最胜,谓烦恼所知二障无障所集起故。

若施是波罗蜜多耶?设波罗蜜多是施耶?有施非波罗蜜多,应作四句。如于 其施,如是于余波罗蜜多亦作四句如应当知。

²何因缘故,如是六种波罗蜜多此次第说?谓前波罗蜜多随顺生后波罗蜜多³故。

⁴复次,此诸波罗蜜多训释名言云何可见?于诸世间、声闻、独觉施等善根最为殊胜,能到彼岸,是故通称波罗蜜多。⁵又能破裂悭恪、贫穷,及能引得广大财位、福德资粮故名为施。又能息灭恶戒、恶趣及能取得善趣等持故名为戒。又能灭尽忿怒、怨雠及能善住自他安隐故名为忍。又能远离所有懈怠、恶不善法及能出生无量善法令其增长故名精进。又能消除所有散动及能引得内心安住故名静虑。又能除遣一切见趣诸邪恶慧及能真实品别知法故名为慧。

⁶云何应知修习如是波罗蜜多?应知此修略有五种:一、现行修:二、胜解修: 三、作意修; 四、方便善巧修; 五、成所作事修。此中四修如前已说,成所作事 修者, 谓诸如来任运佛事无有休息, 于其圆满波罗蜜多复更修习六到彼岸。又作 意修者,谓修六种意乐所摄爱重随喜欣乐作意:一、「广大意乐;二、长时意乐; 三、欢喜意乐; 四、荷恩意乐; 五、大志意乐; 六、纯善意乐。若诸菩萨乃至若 干无数大劫现证无上正等菩提,经尔所时一一刹那,假使顿舍一切身命,以殑伽 河沙等世界盛满七宝奉施如来,乃至安坐妙菩提座,如是菩萨布施意乐犹无厌足。 经尔所时一一刹那, 假使三千大千世界满中炽火, 于四威仪常乏一切资生众具, 戒、忍、精进、静虑、般若心恒现行,乃至安坐妙菩提座,如是菩萨所有戒、忍、 精进、静虑、般若意乐犹无厌足,是名菩萨广大意乐。又诸菩萨即于此中无厌意 乐乃至安坐妙菩提座常无间息,是名菩萨长时意乐。又诸菩萨以其六种波罗蜜多 饶益有情,由此所作深生欢喜蒙益有情所不能及,是名菩萨欢喜意乐。又诸菩萨 以其六种波罗密多饶益有情,见彼于己有大恩德,不见自身于彼有恩,是名菩萨 荷恩意乐。又诸菩萨即以如是六到彼岸所集善根深心回施一切有情,令得可爱胜 果异熟,是名菩萨大志意乐。又诸菩萨复以如是六到彼岸所集善根共诸有情回求 无上正等菩提,是名菩萨纯善意乐。如是菩萨修此六种意乐所摄爱重作意。又诸 菩萨于余菩萨六种意乐修习相应无量善根深心随喜,如是菩萨修此六种意乐所摄 随喜意乐。又诸菩萨深心欣乐一切有情六种意乐所摄六种到彼岸修,亦愿自身与 此六种到彼岸修恒不相离,乃至安坐妙菩提座,如是菩萨修此六种意乐所摄欣乐 作意。若有闻此菩萨六种意乐所摄作意修已,但当能起一念信心,尚当发生无量 福聚, 诸恶业障亦当消灭, 何况菩萨?

⁸此诸波罗蜜多差别云何可见?应知一一各有三品。施三品者:一、法施;

¹以下隋本第四品內相章第三。

²以下隋本次第章第四。

³陳本次有一句云: "復次前前波羅蜜由後後波羅蜜所清淨故。"

⁴以下隋本立名章第五。

⁵陳隋本此段皆分別六度名字爲二語釋之,如釋施云:"破慳爲檀,引得資糧爲那。"

⁶以下隋本修習章第六。

⁷藏本此語作無厭足意樂。次同。

⁸以下隋本第四品內差別章第七。

二、财施;三、无畏施。戒三品者:一、律仪戒;二、摄善法戒;三、饶益有情戒。忍三品者:一、耐怨害忍;二、安受苦忍;三、谛察法忍。精进三品者:一、被甲精进;二、加行精进;三、无怯弱、无退转、无喜足精进。静虑三品者:一、安住静虑;二、引发静虑;三、成所作事静虑。慧三品者:一、无分别加行慧;二、无分别慧;三、无分别后得慧。

¹如是相摄云何可见?由此能摄一切善法是其相故,是随顺故,²是等流故。³ 如是所治摄诸杂染云何可见?是此相故,是此因故,是此果故。

^⁴如是六种波罗蜜多所得胜利云何可见?谓诸菩萨流转生死富贵摄故,大生摄故,大朋大属之所摄故,广大事业加行成就之所摄故,无诸恼害性薄尘垢之所摄故,善知一切⁵工论明处之所摄故。胜生无罪乃至安坐妙菩提座,常能现作一切有情一切义利,是名胜利。

"如是六种波罗蜜多互相决择云何可见?世尊于此一切六种波罗蜜多,或有处所以施声说,或有处所以戒声说,或有处所以忍声说,或有处所以勤声说,或有处所以定声说,或有处所以慧声说。如是所说有何意趣?谓于一切波罗蜜多修加行中皆有一切波罗蜜多互相助成,如是意趣。此中有一唱柁南颂:

数相及次第,训词修差别,摄所治功德,互决⁷择应知。

摄大乘论本卷第二

¹以下隋本攝章第八。

²藏本此句云: "是彼果攝故。"陳本同。

³以下隋本對治章第九。

⁴以下隋本第四品內功德章第十。

⁵原刻作功,今依藏本及麗刻改。

⁶以下隋本互顯章第十一互决擇者,藏本魏本皆云互相决定分別。

⁷原刻作攝,今依麗刻改。

摄大乘论本卷第三

无着菩萨造 唐三藏法师玄奘奉诏译

1彼修差别分第六

如是已说彼入因果,彼修差别云何可见?由菩萨十地。何等为十?一、极喜地;二、离垢地;三、发光地;四、焰²慧地;五、极难胜地;六、现前地;七、远行地;八、不动地;九、善慧地;十、法云地。

如是诸地安立为十云何可见?为欲对治十种无明所治障故。所以者何?以于十相所知法界有十无明所治障住。云何十相所知法界?谓初地中由徧行义,第二地中由最胜义,第三地中由胜流义,第四地中由无摄受义,第五地中由相续无差别义,第六地中由无杂染清净义,第七地中由种°种法无差别义,第八地中⁴由不增不减义、相自在依止义、土自在依止义,第九地中由智自在依止义,第十地中由业自在依止义、陀罗尼门三摩地门自在依止义。此中有三颂:

偏行最胜义,及与胜流义,如是无摄义,相续无别义。 无杂染净义,种种无别义,不增不减义,四自在依义。 ⁵法界中有十,不染污无明,治此所治障,故安立十地。

复次,应知如是无明于声闻等非染污,于诸菩萨是染污。6

复次,何故初地说名极喜?由此最初得能成办自他义利胜功能故。何故二地说名离垢?由极远离犯戒垢故。何故三地说名发光?由无退转等持等至所依止故,大法光明所依止故。何故四地说名焰慧?由诸菩提分法焚灭一切障故。何故五地名极难胜?由真谛智与世间智更互相违,合此难合令相应故。何故六地说名现前?由缘起智为所依止,能令般若波罗蜜多现在前故。何故七地说名远行?至功用行最后边故。何故八地说名不动?由一切相有功用行不能动故。何故九地说名善慧?由得最胜无碍智故。何故十地说名法云?由得总缘一切法智含藏一切陀罗尼门三摩地门,譬如大云能覆如空广大障故;又于法身能圆满故。7

得此诸地云何可见?由四种相:一、得胜解,谓得诸地深信解故;二、得正 ⁸行,谓得诸地相应十种正法行故;三、得通达通于初地达法界时徧能通达一切地故;四、得成满,谓修诸地到究竟故。⁹

修此诸地云何可见?谓诸菩萨于地地中修奢摩他、毗钵舍那由五相修。何等为五?谓集总修,无相修,无功用修,炽盛修,无喜足修。如是五修令诸菩萨成办五果,谓念念中销融一切麤重依止,离种种"想得法苑乐,能正了知周徧无量无分限相大法光明,顺清净分无所分别无相现行,为令法身圆满成办能正摄受后

¹以下藏本魏本不分品,陳本作入因果修差別勝相第五,隋本作修差別勝相勝語第五,又分五章,此對治章第一。

²藏本無此慧字。三本同。

³此字依藏本及麗刻加。

⁴魏本以不增減屬第八地,陳隋本以相土自在屬第九地。

⁵陳本缺此頌,別有釋云:"如此二偈依《中邊分別論》應當了知。"

⁶以下隋本第五品內立名章第二。

⁷以下隋本得相章第三。

⁸原刻作得,今依藏本及麗刻改。

⁹以下隋本第五品內修相章第四。

¹⁰原刻作相,今依藏本及二釋改。

后胜因。

由增胜故,说十地中别修十种波罗蜜多。于前六地所修六种波罗蜜多,如先已说。后四地中所修四者:一、方便善巧波罗蜜多,谓以前六波罗蜜多所集善根共诸有情回求无上正等菩提故;二、愿波罗蜜多,谓发种种微妙大愿引摄当来波罗蜜多殊胜众缘故;三、力波罗蜜多,谓由思择修习二力令前六种波罗蜜多无间现行故;四、智波罗蜜多,谓由前六波罗蜜多成立妙智受用法乐成熟有情故。又此四种波罗蜜多,应知般若波罗蜜多无分别智后得智摄;又于一切地中非不修习一切波罗蜜多,如是法门是波罗蜜多藏之所摄。¹

复次,凡经几时修行诸地可得圆满?有五补特伽罗经三无数大劫,谓胜解行补特伽罗经初无数大劫修行圆满,清净增上意乐行补特伽罗及有相行、无相行补特伽罗于前六地及第七地经第二无数大劫修行圆满,即此无功用行补特伽罗从此已上至第十地经第三无数大劫修行圆°满。此中有颂:

清净增上力,坚固心升进,名菩萨3初修,无数三大劫。

⁴增上戒学分第七

如是已说因果修差别,此中增上戒殊胜云何可见?如菩萨地正受菩萨律仪中说。

复次,应知略由四种殊胜故此殊胜:一、由差别殊胜;二、由共不共学处殊胜;三、由广大殊胜;四、由甚深殊胜。

差别殊胜者,谓菩萨戒有三品别:一、律仪戒;二、摄善法戒;三、饶益有情戒。此中律仪戒应知二戒⁵建立义故,摄善法戒应知修集一切佛法建立义故,饶益有情戒应知成熟一切有情建立义故。

共不共学处殊胜者,谓诸菩萨一切性罪不现行故与声闻共,⁶相似遮罪有现行故与彼不共;于此学处有声闻犯菩萨不犯,有菩萨犯声闻不犯;菩萨具有身语心戒,声闻唯有身语二戒,是故菩萨心亦有犯非诸声闻。以要言之,一切饶益有情无罪身语意业菩萨一切皆应现行、皆应修学。如是应知说名为共不共殊胜。

广大殊胜者,复由四种广大故:一、由种种无量学处广大故;二、由摄受无量福德广大故;三、由摄受一切有情利益安乐意乐广大故;四、由建立无上正等菩提广大故。

甚深殊胜者,谓诸菩萨由是品类方便善巧,行杀生等十种作业而无有罪,生 无量福,速证无上正等菩提;又诸菩萨现行变化身语两业应知亦是甚深尸罗,由 此因缘或作国王,示行种种恼有情事,安立有情毗奈耶中;又现种种诸本生事, 示行逼恼诸余有情,真实摄受诸余有情,先令他心深生净信,后转成熟。是名菩 萨所学尸罗甚深殊胜。

由此略说四种殊胜,应知菩萨尸罗律仪⁷最为殊胜。如是差别菩萨学处应知

¹以下隋本修時章第五。

²陳本此下有釋七阿僧祗劫及三十三阿僧祗劫兩段。

³藏本無此初字。三本同。

⁴藏本魏本不分品,陳本作依戒學勝相第六,隋本作增上戒學勝相勝語第六。

⁵藏本此語作依止義,陳隋本同,與無性合。次文例知。

⁶藏本無此相似二字,魏陳本同。今譯從世親。又似字原刻作以,今依世親及麗刻改。

⁷原刻下衍略字,今依藏本及麗刻刪。

'增上心学分第八

如是已说增上戒殊胜,增上心殊胜云何可见?略由六种差别应知:一、由所缘差别故;二、由种种差别故;三、由对治差别故;四、由堪能差别故;五、由引发差别故;六、由作业差别故。所缘差别者,谓大乘法为所缘故;种种差别者,谓大乘光明、²集福、定王贤守、健行等三摩地种种无量故;对治差别者,谓一切法总相缘智以楔出楔道理遣阿赖耶识中一切障麤重故;堪能差别者,谓住静虑乐,随其所欲即受生故;引发差别者,谓能引发一切世界无碍神通故;作业差别者,谓能振动、炽然、徧满、显示、转变、往来、卷舒,一切色像皆入身中,所往同类或显或隐,所作自在,伏他神通,施辩念乐,放大光明,引发如是大神通故。

又能引发摄诸难行³十难行故。十难行者:一、自誓难行,誓受无上菩提愿故;二、不退难行,生死众苦不能退故;三、不背难行,一切有情虽行邪行而不弃故;四、现前难行,怨有情所现作一切饶益事故;五、不染难行,生在世间,不为世法所染污故;六、胜解难行,于大乘中虽未能了,然于一切广大甚深生信解故;七、通达难行,具能通达补特伽罗法无我故;八、随觉难行,于诸如来所说甚深秘密言词能随觉故;九、不离不染难行,不舍生死而不染故;十、加行难行,能修诸佛安住解脱一切障碍,穷生死际不作功用,常起一切有情一切义利行故。

复次,随觉难行中于佛何等秘密言词彼诸菩萨能随觉了?谓如经言:云何菩萨能行惠施?若诸菩萨无少所施,然于十方无量世界广行惠施。云何菩萨乐行惠施?若诸菩萨于一切施都无欲乐。云何菩萨于惠施中深生信解?若诸菩萨不信如来而行布施。云何菩萨于施策励?若诸菩萨于惠施中不自策励。云何菩萨于施耽乐?若诸菩萨无有暂时少有所施。云何菩萨其施广大?若诸菩萨于施惠中离⁴娑洛想。云何菩萨其施清净?若诸菩萨⁵强波陀悭。云何菩萨其施究竟?若诸菩萨不住究竟。云何菩萨其施自在?若诸菩萨于惠施中不自在转。云何菩萨其施无尽?若诸菩萨不住无尽。

如于布施,于戒为初、于慧为后,随其所应当知亦尔。云何能杀生?若断众生生死流转。云何不与取?若诸有情无有与者自然摄取。云何欲邪行?若于诸欲了知是邪而修正行。云何能妄语?若于妄中能说为妄。云何⁶贝戍尼?若能常居最胜空住。云何⁷波鲁师?若善安住所知彼岸。云何绮间语?若正说法品类差别。云何能贪欲?若有数数欲自证得无上静虑。云何能瞋恚?若于其心能正憎害一切烦恼。云何能邪见?若一切处徧行邪性皆如实见。

甚深佛法者,云何名为甚深佛法?此中应释。谓常住法是诸佛法,以其法身是常住故;又断灭法是诸佛法,以一切障永断灭故;又生起法是诸佛法,以变化身现生起故;又有所得法是诸佛法,八万四千诸有情行及彼对治皆可得故;又有贪法是诸佛法,自誓摄受有贪有情为己体故;又有瞋法是诸佛法,又有痴法是诸

¹以下藏本第四卷,不分品。魏本同,陳本作依心學勝相第七,隋本作增上心學勝相勝語第七。

²藏本以集福爲一種三摩地,定王賢守又爲一種,與魏本及《大般若經》第四十一卷相同。但勘世親及《成唯識論》卷九,皆以集福定王爲一種,賢守又爲一種,未知孰是。今姑從藏本分讀。

⁴藏本此語作不堅實,魏隋本同。無性云娑洛顯目堅實,意反。

⁵藏本此語作能起,魏本同,與無性合。

⁶藏本此語直譯爲離間語,魏隋本同。

⁷藏本此語直譯爲粗惡語,魏隋本同。

佛法,又异生法是诸佛法,应知亦尔;又无染法是诸佛法,¹成满真如一切障垢不能染故;又无污法是诸佛法,生在世间诸世间法不能污故。是故说名甚深佛法。 又能引发修到彼岸、成熟有情、净佛国土²诸佛法故,应知亦是菩萨等持作业差别。

³增上慧学分第九

如是已说增上心殊胜,增上慧殊胜云何可见?谓无分别智若自性、若所依、若因缘、若所缘、若行⁴相、若任持、若助伴、若异熟、若等流、若出离、若至究竟、若加行无分别后得胜利、若差别、若无分别后得譬喻、若无功用作事、若甚深,应知无分别智名增上慧殊胜。此中无分别智离五种相以为自性:一、离无作意故;二、离过有寻有伺地故;三、离想受灭寂静故;四、离色自性故;五、离于真义异计度故。离此五相,应知是名无分别智。于如所说无分别智成立相中复说多颂;

⁵诸菩萨自性,远离五种相,是无分别智,不异计于真。 诸菩萨所依, 非心而是心, 是无分别智, ⁶非思义种类。 诸菩萨因缘,有言闻熏习,是无分别智,及如理作意。 诸菩萨所缘,「不可言法性,是无分别智,无我性真如。 诸菩萨行相,复于所缘中,是无分别智,彼所8知无相。 相应自性义,所分别非余,字展转相应,是谓相应义。 非离彼能诠,智于所诠转,非诠不同故,一切不可言。 诸菩萨任持,是无分别智,后所得诸行,为进趣增长。 诸菩萨助伴,说为二种道,是无分别智,五到彼岸性。 诸菩萨异熟,于佛二会中,是无分别智,由加行证得。 诸菩萨等流,于后后生中,是无分别智,自体转增胜。 诸菩萨出离,⁹得成办相应,是无分别智,应知于十地。 诸菩萨究竟,得清净三身,是无分别智,得最上自在。 10如虚空无染,是无分别智,种种极重恶,由唯信胜解。 如虚空无染,是无分别智,解脱一切障,得成办相应。 如虚空无染,是无分别智,常行于世间,非世法所染。 如症求受义,如症正受义,如非症受义,三智譬如是。 如愚求受义,如愚正受义,如非愚受义,三智譬如是。 如五求受义,如五正受义,如"末那受义,三智譬如是。 如未解于论, 求论受法义, 次第譬三智, 应知加行等。

¹藏本此句云: "於成就如性中一切障不染故。"

²藏本此語云: "成就一切佛法故。"三本大同,與二釋亦合,今譯文略。

³藏本、魏本不分品,陳本作依慧學勝相第八,隋本作增上慧學勝相勝語第八。

⁴此下藏本有若釋難一語,陳隋本有若建立若釋難二語。勘二釋後有二頌判爲釋通疑難,與藏本合,今譯缺文。

⁵藏本此頌前半云:"諸菩薩之智無分別自性。"意義較暢,今譯文晦。餘頌例知.

⁶藏本此句意云: "不思惟境義所起故。"

⁷藏本此句意云:"諸法之離言性。'

⁸原刻作智, 今依藏本及麗刻改。

⁹藏本此句合末句云: "應知於十地得及成就故。"與二釋合。

¹⁰藏本此頌云: "是無分別智由唯信勝解,於種種極惡無染如虚空。"意義更順。今譯文晦。次二頌例知。 ¹¹原刻作求,今依藏本及麗刻改。

如人正闭目,是无分别智,即彼复开目,后得智亦尔。 应知如虚空,是无分别智,于中现色相,后得智亦尔。 如末尼天乐,无思成自事,种种佛事成,常离思亦尔。 非于此非余,^¹非智而是智,与境无有异,智成无分别。 应知一切法,本性无分别,所分别无故,^²无分别智无。

此中加行无分别智有三种,谓因缘、引发、数习生差别故;根本无分别智亦有三种,谓喜足、无颠倒、无戏论无分别差别故;后得无分别智有五种,谓通达、随念、安立、和合、如意思择差别故。

复有多颂成立如是无分别智:

鬼傍生人天,各随其所应,等事心异故,许义非真实。 于过去事等,梦像二影中,虽所缘非实,而境相成就。 若义义性成,无无分别智,此若无佛果,证得不应理。 得自在菩萨,由胜解力故,如欲地等成,得定者亦尔。 成就简择者,有智得定者,思惟一切法,如义皆显现。 无分别智行,诸义皆不现,当知无有义,由此亦无识。

般若波罗蜜多与无分别智无有差别,³如说菩萨⁴安住般若波罗蜜多非处相应能于所余波罗蜜多修习圆满。云何名为非处相应修习圆满?谓由远离五种处故:一、远离外道我执处故;二、远离未见⁵真如菩萨分别处故;三、远离生死涅盘二边处故;四、远离唯断烦恼障生喜足处故;五、远离不顾有情利益安乐住、无余依涅盘界处故。

诸大悲为体,由五相胜智,世出世满中,说此最高远。

若诸菩萨成就如是增上尸罗、增上质多、增上般若功德圆满,于诸财位得大自在,何故现见有诸有情匮乏财位?见彼有情于诸财位有重业障故,见彼有情若施财位障生善法故,见彼有情若乏财位厌离现前故,见彼有情若施财位即为积集不善法因。此中有颂:

见业障现前,积集损恼故,现有诸有情,不感菩萨施。

^{&#}x27;藏本此句云:"非智非非智。"魏陳本同。

²藏本此句云: "故智無分別。"魏本同。但勘二釋,皆云: "一切有情無有無分別智。"

³魏本此語云:"如《大品經》說。"

⁴藏本此語云: "以不住相住於般若。"魏隋本同。

⁵藏本此二字作真實,隋本同,與真如字異。次段例知。

¹彼果断分第十

如是已说增上慧殊胜,彼果断殊胜云何可见?"断谓菩萨无住涅盘,以舍杂染不舍生死二所依止转依为相。此中生死谓依他起性杂染分,涅盘谓依他起性清净分,二所依止谓通二分依他起性,转依谓即依他起性对治起时转舍杂染分转得清净分。又此转依略有六种:一、"损力益能转,谓"由胜解力闻熏习住故,及由有羞耻令诸烦恼少分现行不现行故;二、通达转,"谓诸菩萨已入大地,于真实非真实显现"不显现现前住故,乃至六地;三、修习转,谓犹有障,一切相不显现真实显现故,乃至十地;四、果圆满转,谓永无障,一切相不显现最清净真实显现,于一切相得自在故;五、下劣转,谓声闻等唯能通达补特伽罗空无我性,一向背生死一向舍生死故;六、广大转,谓诸菩萨兼通达法空无我性,即于生死见为寂静,虽断杂染而不舍故。若诸菩萨住下劣转,有何过失?不顾一切有情利益安乐事故,违越一切菩萨法故,与下劣乘同解脱故,是为过失。若诸菩萨住广大转,有何功德?生死法中以自转依为所依止得自在故,于一切趣示现"一切有情之身,于最胜生及三乘中种种调伏方便善巧安立所化诸有情故,是为功德。此中有多颂:

诸凡夫覆真,⁸一向显虚妄,诸菩萨舍妄,一向显真实。 ⁹应知显不显,真义非真义,转依¹⁰即解脱,随欲自在行。 于生死涅盘,若起平等智,尔时¹¹由此证,生死即涅盘。 由是于生死,非舍非不舍,¹²亦即于涅盘,非得非不得。

13彼果智分第十一

如是已说彼果断殊胜,彼果智殊胜云何可见?谓由三种佛身应知彼果智殊胜:一、由自性身;二、由受用身;三、由变化身。此中自性身者,谓诸如来法身,一切法自在转所依止故;受用身者,谓依法身种种诸佛众会所显,¹⁴清净佛土大乘法乐为所受故;变化身者,亦依法身,从覩史多天宫现没、受生、受欲、踰城出家、往外道所修诸苦行、证大菩提、转大法轮、入大涅盘故。¹⁵此中说一唱柁南颂;

¹藏本、魏本不分品,陳本作學果寂滅勝相第九,隋本作寂滅勝相勝語第九。

²藏本此句正答上問爲一段,次句釋相云"彼相者,以捨雜染"云云,又爲一段。陳本同。

³藏本此語云作損益,無力能二字。魏本同。

⁴藏本此二句云"以勝解力而住聞熏及有羞恥爲依"云云,用第七轉聲顯義,熏習住下無故字。無性云"由聞熏住有羞故"云云,大同。今譯從世親。

⁵藏本此句云: "謂已入地諸菩薩之轉依。"與無性合。今譯文略。次下四段例知。

⁶藏本無此不顯現三字,三本並同,與世親合。今譯從無性。

⁷原刻此二字作所有,今依藏本及麗刻改。

⁸藏本此二字作一切,魏隋本同,與二釋亦合。

⁹藏本此二句云: "應知無有義,不顯及與顯。"魏陳本同,與世親合。

¹⁰藏本此語合下句云: "隨欲行而解脫。"魏本同,與無性合。

¹¹藏本此語合下句云:"故於此即生死爲涅槃、"與二釋合。今譯文略。

¹²藏本此句云:"故亦於涅槃。"與世親合。今譯文略。

¹³藏本魏本不分品,陳本作智差別勝相第十,隋本作智勝相勝語第十。

¹⁴藏本此句云: "清淨佛土及大乘法樂爲所受故。"但勘二釋,皆云: "於清淨佛土中受大乘法樂。" ¹⁵陳本此頌在次略有五相句下。

相证得自在,依止及摄持,差别德甚深,念业明诸佛。

诸佛法身以何为相?应知法身略有五相:一、转依为相,谓转灭一切障杂染分依他起性故,转得解脱一切障于法自在转现前清净分依他起²性故。二、白法所成为相,谓六波罗蜜多圆满得十自在故,此中寿自在、心自在、众具自在由施波罗蜜多圆满故,业自在、生自在由戒波罗蜜多圆满故,胜解自在由忍波罗蜜多圆满故,愿自在由精进波罗蜜多圆满故,神力自在五通所摄由静虑波罗蜜多圆满故,智自在、法自在由般若波罗蜜多圆满故。三、无二为相,谓有无无二为相,由一切法无所有故,³空所显相是实有故;有为无为无二为相,⁴由业烦恼非所为故,自在示现有为相故;异性一性无二为相,由一切佛所依无差别故,无量相续现等觉故。此中有二颂:

我执不有故,于中无别依,随前能证别,故施设有异。 种姓异⁵非虚,圆满无初故,⁶无垢依无别,故非一非多。

四、常住为相,谓真如清净相故,本愿所引故,所应作事无竟期故。五、不可思议为相,谓真如清净自内证故,无有世间喻能喻故,非诸寻思所行处故。

复次,云何如是法身最初证得?谓缘总相大乘法境无分别智及后得智五相善修,于一切地善集资粮,⁷金刚喻定破灭微细难破障故,此定无间离一切障故得转依。

复次,法身由几自在而得自在?略由五种:一、由佛土、自身、相好、无边音声、无见顶相自在,由转色蕴依故;二、由无罪、无量、广大乐住自在,由转受蕴依故;三、由辩说一切名身、句身、文身自在,由转想蕴依故;四、由现化、变易、引摄大众、引摄白法自在,由转行蕴依故;五、由圆镜、平等、观察、成所作智自在,由转识蕴依故。

复次,⁸法身由几种处应知依止?略由三处:一、由种种佛住依止。此中有二颂:

诸佛证得⁹五性喜,皆由等¹⁰证自界故,离喜都由不证此,故求喜者应等证。由能¹¹无量及事成,法味义德俱圆满,¹²得喜最胜无过失,诸佛见常无尽故。

二、由种种受用身依止,但为成熟诸菩萨故。三、由种种变化身依止,多为成熟

¹藏本無此明字,魏隋本同。今從陳本取世親釋意潤文。

²此下原刻衍相字,今依藏本及麗刻刪。

³藏本此語云空相,陳隋本同,無所顯二字。今譯取意潤文。

⁴藏本此句云: "非由諸業惑所爲故。"與世親合。今譯從無性。

⁵藏本此語作無義故,魏本同,意謂應成無果故,亦通。

⁶藏本此二句云: "佛於無垢依非一亦非多。"三本意同,均無無別二字。又與無性合,意謂於無垢依法界中不可定執諸佛非一非多也。今譯從世親。

⁷藏本此二句云: "破滅難破障故,由金剛喻定彼無間時離一切障故,從此等轉依故得。"答上問"云何初得法身也"。陳本同。又與二釋合。今譯文略。

⁸藏本此句云: "法身應知幾處之所依止?"陳隋本同,亦與二釋合。

⁹藏本此語云: "五種自性喜。"

¹⁰原刻作種,今依藏本及麗刻改。

¹¹藏本無量二字在義德圓滿下,與能事成法味等相貫,與無性合。

¹²藏本此二句頌互倒,隋本同,亦與無性合。

声闻等故。

应知法身由几佛法之所摄持?略由六种:一、由'清净,谓转阿赖耶识得法身故;二、由异熟,谓转色根得异熟智故;三、由安住,谓转欲行等住得无量智住故;四、由自在,谓转种种摄受业自在,得一切世界无碍神通智自在故;五、由言说,谓转一切见闻觉知言说戏论,得令一切有情心喜辩说智自在故;六、由拔济,谓转拔济一切灾横过失,得拔济一切有情一切灾横过失智故。应知法身由此所说六种佛法之所摄持。诸

佛法身当言有异,当言无异? 依止意乐业无别故,当言无异;无量依身现等 觉故,当言有异。如说佛法身,受用身亦尔,意乐及业无差别故,当言无异;不 由依止无差别故,无量依止差别转故。应知变化身如受用身说。

应知法身几德相应?谓最清净四无量、²解脱胜处徧处、无诤、愿智、四无碍解、六神通、三十二大士相八十随好、四一切相清净、十力、四无畏、三不护、三念住、拔除习气、无忘失法、大悲、十八不共佛法、一切相妙智等功德相应。此中有多颂:

怜愍诸有情,起和合远离,常不舍利乐,四意乐³归礼。 解脱一切障,牟尼胜世间,智周徧所知,心解脱归礼。 能灭诸有情,一切惑无余,害烦恼有染,常哀愍归礼。 无功用无着,无碍常寂定,于一切问难,能解释归礼。 于所依能依, 所说言及智, 能说无碍慧, 常善说归礼。 为彼诸有情,故现知言行,往来及出离,善教者归礼。 诸众生见尊,皆审知善士,暂见便深信,⁴开导者归礼。 摄受住持舍,现化及变易,等持智自在,随证得归礼。 方便归依净,及大乘出离,于此诳众生,摧魔者归礼。 能说智及断, 出离能障碍, 自他利非余, 外道伏归礼。 处众能伏说,远离二杂染,无护无忘失,摄御众归礼。 徧一切行住, 无非圆智事, 一切时徧知, 实义者归礼。 诸有情利乐, 所作不过时, 所作常无虚, 无忘失归礼。 昼夜常六返, 观一切世间, 与大悲相应, 利乐意归礼。 由行及由证,由智及由业,于一切二乘,最胜者归礼。 由三身至得,具相大菩提,一切处他疑,皆能断归。礼。

诸佛法身与如是等功德相应,复与所余自性、因、果、业相应,转功德相应,是 故应知诸佛法身无上功德。此中有二颂:

> 尊成实胜义,一切地皆出,至诸众生上,解脱诸有情。 无尽无等德,相应现世间,及众会可见,非见人天等。

¹藏本此語作清淨佛法,陳本同,與二釋合。

²藏本此數語作八解脫、八勝處、十徧處,具出名數,陳本同,與無性合。

³藏本每頌句末皆云歸禮汝 khyod-la phyag-h!tshal,蓋此讚對具功德之佛而言也。今譯文略。又此云汝,即下文所譯尊字。

⁴藏本無此開導者一語,陳本同。又此導字原刻作道,今依無性及麗刻改。

⁵藏本此下有一頌云: "無畏無過失,無濁無有住,於諸法不動,無戲論歸禮。"陳隋本同。但勘二釋無此 文意。

复次,诸佛法身甚深最甚深,此甚深相云何可见?此中有多颂:

佛无生为生,亦无住为住,诸事无功用,第四食为食。 无异亦无量,无数量一业,不坚业坚业,诸佛具三身。 现等觉非有,一切觉非无,一一念无量,有非有所显。 '非染非离染,由欲得出离,了知欲无欲,悟入欲法性。 诸佛过诸藴,安住诸藴中,与彼非一异,不舍而善寂。 诸佛事相杂,犹如大海水,我已现当作,他利无是思。 众生罪不现,如月于破器,徧满诸世间,由法光如日。 或现等正觉,或涅盘如火,此未曾非有,诸佛身常故。 佛于非圣法,人趣及恶趣,非梵行法中,最胜自体住。 佛一切处行,亦不行一处,于一切身现,非六根所行。 烦恼伏不灭,如毒呪所害,留惑至惑尽,证佛一切智。 烦恼成觉分,生死为涅盘,具大方便故,诸佛不思议。

应知如是所说甚深有十二种,谓生²住业住甚深、安立数业甚深、现等觉甚深、 离欲甚深、断蕴甚深、成熟甚深、显现甚深、示现等觉涅盘甚深、住甚深、显示 自体甚深、断烦恼甚深、不可思议甚深。

若诸菩萨念佛法身,由几种念应修此念?略说菩萨念佛法身由七种念应修此念:一者³诸佛于一切法得自在转应修此念,于一切世界得无碍通故。此中有颂:

4有情界周徧,具障而阙因,二种决定转,诸佛无自在。

二者如来其身常住应修此念,真如无间解脱垢故。三者如来最胜无罪应修此念,一切烦恼及所知障并离系故。四者如来无有功用应修此念,不作功用一切佛事无休息故。五者如来受大富乐应修此念,清净佛土大富乐故。六者如来离诸染污应修此念,生在世间一切世法不能染故。七者如来能成大事应修此念,示现等觉般涅盘等,一切有情未成熟者能令成熟、已成熟者令解脱故。此中有二颂:

⁵圆满属自心,具常住清净,无功用能施,有情大法乐。 徧行无依止,平等利多生,一切佛智者,应修一切念。

复次,诸佛清净佛土相云何应知?如菩萨藏百千契经序品中说,谓薄伽梵住 最胜光曜七宝庄严放大光明普照一切无边世界,无量方所妙饰间列,周圆无际, 其量难测,超过三界所行之处,胜出世间善根所起,最极自在净识为相,如来所 "都,诸大菩萨众所云集,无量天、龙、药叉、健达缚、阿素洛、揭路荼、紧捺 洛、莫呼洛伽、人、非人等常所翼从,广大法味喜乐所持,作诸众生一切义利,

¹藏本此句云: "非欲非離欲。"與下文相順。陳本同。

²藏本此字作涅槃,陳本作不住,意亦通。

 $^{^3}$ 藏本此二句文倒,略云"應修此念佛,謂於一切世界得無礙神通故,諸佛世尊於一切法得自在",意義更明。次下各句例知。但皆略應修此念佛一語。

⁴藏本以此爲第三句,與無性合。

⁵藏本圓滿二字在次大法樂句末,意貫上下各語,與二釋合。

⁶原刻作覩,今依藏本及麗刻改。

蠲除一切烦恼灾横,远离众魔,过诸庄严如来庄严之所依处,大念慧行以为游路,大止妙观以为所乘,大空、无相、无愿解脱为所入门,无量功德众所庄严大宝华王之所建立大宫殿中。如是现示清净佛土,显色圆满、形色圆满、分量圆满、方所圆满、因圆满、果圆满、¹主圆满、辅翼圆满、眷属圆满、任持圆满、事业圆满、摄益圆满、无畏圆满、住处圆满、路圆满、乘圆满、门圆满、依持圆满。

复次,受用如是清净佛土,一向净妙、一向安乐、一向无罪、一向自在。

复次,应知如是诸佛法界于一切时能作五业:一者救济一切有情灾横为业,于暂见时便能救济盲聋狂等诸灾横故;二者救济恶趣为业,拔诸有情出不善处,置善处故;三者救济非方便为业,令诸外道舍非方便求解脱行,置于如来圣教中故;四者救济萨迦耶为业,授与能超三界道故;五者救济乘为业,²拯拔欲趣余乘菩萨及不定种姓诸声闻等,安处令修大乘行故。于此五业应知诸佛业用平等。此中有颂:

因依事3性行, 4别故许业异, 世间此力别, 无故非导师。

若此功德圆满相应诸佛法身不与声闻独觉乘共,以何意趣佛说一乘?此中有二颂:

为引摄一类,及任持所余,由不定种姓,诸佛说一乘。 法无我解脱,等故⁵姓不同,⁶得二意乐化,究竟说一乘。

如是诸佛同一法身而佛有多,何缘可见?此中有颂:

一界中无二,同时无量圆,次第转非理,故成有多佛。

云何应知于法身中佛非毕竟入于涅盘,亦非毕竟不入涅盘?此中有颂:

一切障脱故,所作无竟故,佛毕竟涅盘,毕竟不涅盘。

何故受用身非即自性身?由六因故。一、色身可见故;二、无量佛众会差别可见故;三、随胜解见,自性不定可见故;四、别别而见,自性变动可见故;五、菩萨、声闻及诸天等种种众会间杂可见故;六、阿赖耶识与诸转识转依非理可见故,佛受用身即自性身,不应道理。

何因变化身非即自性身?由八因故。谓诸菩萨从久远来得不退定,于覩史多及人中生不应道理。又诸菩萨从久远来常忆宿住、书算、数印、工巧论中,及于受用欲尘行中不能正知,不应道理。又诸菩萨从久远来已知恶说善说法教,往外

¹原刻作立, 今依藏本及麗刻改。

²藏本此句云:"拯拔諸不定姓菩薩欲趨餘乘者及諸聲聞,安處於大乘行。"此文以不定姓貫菩薩聲聞二者,與無性合。

³藏本此字作意樂,亦與無性合。

⁴藏本此二句云: "別故由此力,許世間業異。"今依二釋句讀。

⁵原刻作所, 今依藏本及麗刻改。

⁶此二句以三因說一乘,藏本有三故字,與二釋合。今譯文略。

道所不应道理。又诸菩萨从久远来已能善知三乘正道,修邪苦行不应道理。又诸 菩萨舍百拘胝诸瞻部洲,但于一处成等正觉转、正法轮不应道理。若离示现成等 正觉, 唯以化身于所余处施作佛事, 即应但于覩史多天成等正觉, 何不施设徧于 一切赡部洲中同时佛出?既不施设,无教无理,虽有多化而不违彼无二如来出现 世言,由一四洲摄世界故。如二轮王不同出世。此中有颂:

佛微细化身, 多处胎平等, 为显一切种, 成等觉而转。

1为欲利乐一切有情发愿修行证大菩提,毕竟涅盘不应道理,愿行无果成过失故。 佛受用身及变化身既是无常,云何经说如来身常? 2此二所依法身常故。又等流 身及变化身以恒受用无休废故,数数现化不永绝故。如常受乐、如常施食、如来 身常应知亦尔。

³由六因故,诸佛世尊所现化身非毕竟住。一、所作究竟,成熟有情已解脱 故:二、为令舍离不乐涅盘,为求如来常住身故;三、为令舍离轻毁诸佛,令悟 甚深正法教故; 四、为令于佛深生渴仰,恐数见者生厌怠故; 五、令于自身发勤 精进,知正说者难可得故;六、为诸有情极速成熟,令自精进不舍轭故。此中有 二颂:

> 由所作究竟,舍不乐涅盘,离轻毁诸佛,深生于渴仰。 内自发正勤,为极速成熟,故许佛化身,而非毕竟住。

诸佛法身无始时来无别无量,不应为得更作功用。此中有颂:

佛得无别无量因,有情若舍勤功用,证得恒时不成因,断如是因不应理。

4《阿毗达磨大乘经》中《摄大乘品》,我阿僧伽略释究竟。

摄大乘论本卷第三

¹原刻缺此一段三句,今依藏本及麗刻加。又陳本此段在下二頌後方出。

²藏本此句云: "等流及變化身以法爲依故。"

³魏本缺此一段及下頌。

⁴藏本此二句云: "《攝大乘論》,規範師無著造。"蓋是梵本卷末題名也。譯家既從此土文例具出論名作 者於端,即不必更譯此語於末,勘魏本可知。今譯從陳隋本增文。